


33. árg. September 2007 Nr. 83

Fregnir

SOROPTIMISTASAMBAND ÍSLANDS



Efnisyfirlit



Hvatning Soroptimista

Sýnum drenglyndi og verum einlægar í vináttu.
Verum reiðubúnaar til hjálpar og þjónustu.
Sýnum í verki skilning og friðarvilja.
Setjum markið hátt og vinnum störf okkar með
sæmd og ábyrgðartilfinningu.

Markmið Soroptimista

Að vinna að bættri stöðu kvenna.
Að gera háar kröfur til siðgæðis.
Að vinna að mannréttindum öllum til handa.
Að vinna að jafnrétti, framförum og friði,
með alþjóðlegri vináttu og skilningi.

Soroptimistar skulu beita sér fyrir:

Að veita þjónustu í heimabyggð, heimalandi
og á alþjóðavettvangi.
Að taka virkan þátt í ákvarðanatöku hvarvetna
í þjóðfélaginu.

Aðgangur að læstu svæði á vef
soroptimistasambandsins:

Slóðin er www.soroptimist.is/innri

Notandanafn: soropt
Aðgangsorð: systir

Fregnir er fréttablað Soroptimistasambands Íslands

Heimasíða: www.soroptimist.is

Netfang stjórnar: stjorn@soroptimist.is

Umbrot: Gerður Guðmundsdóttir

Prentvinnsla: Prentmet ehf.

■	■	Forsetasíða	3
	■	Ritnefndarpistill	4
	■	Fréttir úr ýmsum áttum	4
	■	Landssambandsfundur	5
	■	Dagskrá haustfundar	11
	■	Sendifulltrúafundurinn í Toulouse	12
	■	Frásögn varasendifulltrúa	15
	■	Ökum varlega	17
	■	Alþjóðasambandsþing soroptimista	18
	■	Hafnarfjarðar- og Garðabæjarklúbbur	
		– kynning	20
	■	Starfið mitt	
		– Sigríður Inga Sigurðardóttir	21
	■	Skagafjarðarklúbbur – kynning	22
	■	Starfið mitt	
		– Ásdís S. Sigurjónsdóttir	23

Forsíðumynd er af verki Jónínu Guðnadóttur,
Soroptimistaklúbbs Hafnarfjarðar og Garðabæjar.
Jónína var valin bæjarlistamaður Hafnarfjarðar 2007.

Verkið heitir Hringiða og vann í lokaðri samkeppni
Landsvirkjunar um listaverk við Kárahnjúka 2006
samkvæmt samkeppnisreglum SÍM.

Hringiða samanstendur af þremur hringformum sem
hvert um sig er 20 m breitt og 1,5 m á hæð og er
göngustígur þvert yfir verkið.

Eitt hringform verður á útsýnisstað við hverja stíflu.

Miðformið í hverju verki verður 7,5 m breitt sem er
jafnt þvermáli aðrennslisganga virkjunarinnar.

Hleðslan verður unnin úr efni af svæðinu, en í kringum
miðformið verður slípað blágrýti sem myndar spíral-
myndir í verkið og á því verður letur úr áli.

Unnið er að undirbúningi verksins sem er áformað að
verði sett upp sumarið 2008.



Ásgerður
Kjartansdóttir

Forsetasiða

Kæru systur!

Þakka ykkur fyrir ánægjulega samveru á landssambandsfundinum á Akureyri síðastliðið vor.

Nú fer nýtt starfsár soroptimista að hefjast og ég vona að þið hafið átt ánægjuríkt sumar og hafið getað notið þeirrar einmuna veðurbliðu sem verið hefur á suður- og vesturlandi. Framundan eru margvísleg verkefni eins og endranær og er mikilvægt að undirbúa vetrardagskrána vel í hverjum klúbbi. Einnig er mikilvægt að þeir embættismenn sem eru að ljúka sínu tímabili aðstoði nýja embættismenn eftir þörfum. Allt klúbbstarfið er á ábyrgð okkar allra.

Að þessu sinni hefur sumarið hjá mér verið sannkallað soroptimistasumar sem hófst með þátttöku í sendifulltrúafundinum í Toulouse í Frakklandi um miðjan maí ásamt sendifulltrúunum Ingunni Sigurðardóttur og Margréti Arnórsdóttur og Hrafnildi Sigurðardóttur varasendifulltrúa. Frásagnir þeirra er að finna hér í blaðinu. Með í för var Hafdís Karlsdóttir sem kjörin var fyrsti varaforseti Evrópusambands soroptimista á fundinum og erum við afskaplega stoltar yfir því.

Næst var haldið til Glasgow í júlí til að sitja stjórnarfund Alþjóðasambands soroptimista. Var þetta merkilegur fundur að því leyti að þarna var lagður grunnur að breytingum á stefnu og sýn soroptimista til næstu framtíðar og miklum breytingum á verkefnakjarna (Program Focus) samtakanna. Alþjóðþing soroptimista var haldið í Glasgow strax að loknum stjórnarfundinum. Voru 1500 soroptimistar alls staðar að úr heiminum þar samankomnar, þar á meðal 19 íslenskar systur ásamt 2 eiginmönnum. Var ráðstefnan bæði fræðandi og skemmtileg

og vel skipulögð í alla staði. Frekari grein verður gerð fyrir bæði stjórnarfundinum og ráðstefnunni hér í blaðinu og á haustfundinum að Reykjum.

Landssambandið vinnur nú að skipulagningu vetrarstarfsins og ber þá hæst undirbúningur norrænu vinadaganna sem haldnir verða í Reykjavík 6.-8. júní 2008. Í undirbúningi er sameiginlegt verkefni með soroptimistum í Danmörku, Finnlandi, Noregi, Svíþjóð, Eistlandi, Lettlandi og Litháen sem felur í sér að vinna gegn mansali en þetta er vaxandi vandamál alls staðar í heiminum og er talið að mansal velti meiri fjármunum en eiturlyfjasala og vopnasala. Stefnt er að því að ýta verkefninu úr hlaði á norrænu vinadögunum næsta vor og kemur það því í hlut landssambandsins að leiða verkefnið til að byrja með.

Haustfundurinn verður haldinn að Reykjum dagana 5.-7. október nk. Dagskrá fundarins er að finna í blaðinu. Ég vonast til að sjá ykkur sem flestar og að við munum eiga þar góða daga. Í boði verður mjög áhugavert námskeið um skipulagningu verkefna í umsjón Sigrúnar Klöru Hannesdóttur, Reykjavíkurklúbbsi. Ég hvet embættismenn eindregið til að mæta á haustfundinn því þar verða kynntar vel þær breytingar sem framundan eru á stefnu samtakanna og verkefnakjarnanum sem verður leiðarljós í starfi okkar næstu fjögur ár.

Ásgerður Kjartansdóttir

*Skilafrestur í næsta blað
er 10. nóvember 2007*

Efni skal skilað á tölvutæku formi, annað hvort á disk
eða í tölvupósti.

Netföng eru: snjolaugsig@simnet.is
sigidursveins@internet.is

Póstur sendist til: Snjólaug Sigurðardóttir
Klapparhlíð 1, íb. 401
270 Mosfellsbæ

Ritnefndarpistill

Ágætu systur!

Þökkum fyrir ánægjulega samveru í vor á Akureyri.

Þá er komið að síðasta blaði þessa fyrra starfsárs okkar. Eins og við kynntum í vorblaðinu var ætlunin að kynna a.m.k. þrjá klúbba í hverju blaði. Þar sem mjög mikið lá fyrir af efni vegna landsfundar, Evrópufundar og að auki alþjóðasambandsfundar þá varð því miður einn

klúbbur að víkja að þessu sinni. Í jólablaðinu verðum við vonandi með kynningar á fjórum klúbbum.

Nú er að hefjast nýtt starfsár og hlökkum við til samstarfsins við ykkur.

Bestu kveðjur,
 Árnína, Júlíana, Kristín, Sigríður og Snjólaug

Fréttir úr ýmsum áttum

Nýir klúbbar

- 22. september 2007 – Caldas Da Rainha, Portúgal
- 13. október 2007 – Bensheim/Heppenheim, Þýskaland
- 13. október 2007 – Ried-Innviertel, Austurríki
- 20. október 2007 – Zagreb Centre, Króatía
- 20. október 2007 – Ellwangen/Jagst, Þýskaland
- 27. október 2007 – Stuttgart Zwei, Þýskaland
- 17. nóvember 2007 – Beersel, Belgía
- 17. nóvember 2007 – Kusadasi, Tyrkland

Ýmislegt

Á hátíðarfundi bæjarstjórnar Mosfellsbæjar 9. ágúst sl. var Salóme Þorkelsdóttir, Mosfellssveitarklúbbi, gerð að heiðursborgara Mosfellsbæjar í tilefni af 20 ára afmæli bæjarins.

Í blaði sænskra soroptimista (Soroptima) frá júní 2007 kemur fram að hinn ástsæli barnabókarithöfundur, Astrid Lindgren, hafi verið soroptimisti í Stokkhólmsklúbbum.

- 5. – 7. október 2007 – 14. haustfundur Soroptimistasambands Íslands að Reykjum í Hrútafirði
- 10. desember 2007 – Alþjóðlegur mannréttindadagur – Ákall forseta Alþjóðasambands soroptimista
- 19. apríl 2008 – Landssambandsfundur Soroptimistasambands Íslands – Árbær
- 11. maí 2008 – 4. alþjóðlega friðarmaræðni í Rúanda
- 6. – 8. júní 2008 – Norrænir vinadagar í Reykjavík
- 19. – 21. september 2008 – 7th European Meeting and Friendship Days, Árósum, Danmörk
- 10. – 12. júlí 2009 – Evrópuþing „Soroptimists go for water“ Amsterdam, Holland

34.

Landssambandsfundur

Soroptimistasambands Íslands

– haldinn í Safnaðarheimili Akureyrarkirkju 28. apríl 2007

Setning fundar

Margrét Eyfells, formaður Akureyrarklúbbs, bauð systur velkomnar og þakkaði þeim samveruna á Amtsbókasafninu kvöldið áður. Þakkaði hún sérstaklega Hólmsfríði Andrésdóttur fyrir að taka á móti systur þar. Hún upplýsti einnig að nú væri metþátttaka en alls voru skráðar 184 systur á fundinn.

Ásgerður Kjartansdóttir, forseti SI/Í, setti síðan fundinn og bauð systur velkomnar. Yngsti þátttakandi fundarins var 5 mánaða en sá elsti var móðir systur í Akureyrarklúbbsi. Ásgerður þakkaði Akureyrarsystur sérstaklega fyrir góðan undirbúning og vandaða umgjörð fundarins. Einnig þakkaði hún Sigríði Ágústsdóttur fyrir uppsetningu veggspjalda en í fundarsal og á gangi fyrir framan voru veggspjöld með hugleiðingum soroptimistasystra og barna um frið. Þakkaði Ásgerður bæjarstjórn Akureyrar fyrir móttökuna kvöldið áður. Minntist hún á þær breytingar, sem orðnar eru, að gögn um fundinn og allar skýrslur er nú að finna á innri vef sambandsins.

Ásgerður bað eftirtaldir systur um að kveikja á kertum: Margréti Eyfells, formann Akureyrarklúbbs, fyrir klúbb sinn og landssambandsfundinn, Guðrínu Erlu Björgvinsdóttur, Bakka- og Seljaklúbbsi, fyrir landssambandið, Sigríði Ágústsdóttur, Akureyrarklúbbsi, fyrir Evrópusamband soroptimista og Hafdísu Karlsdóttur, Kópavogsklúbbsi, fyrir Alþjóðasamband soroptimista.

Ásgerður minntist nýlátinnar systur, Freygerðar Magnúsdóttur úr Akureyrarklúbbsi, og kveikti á hvítu kerti. Jafnframt minntist Ásgerður Luisu Bjarnadóttur, Hafnarfjarðar- og Garðabæjarklúbbsi, en hennar hafði áður verið minnst á haustfundi að Reykjum. Systur risu úr sætum og minntust látinna systur með einnar mínútu þögn.

Sveindís Benediktsdóttir og Bryndís Björg Þórhallsdóttir, yngstu systur Akureyrarklúbbs, lásu hvatningu og markmið. Ásgerður Kjartansdóttir flutti þessu næst fræðsluerindi um embættisskyldur fulltrúa og að því loknu var gengið til dagskrár.

1. Kosning fundarstjóra, fundarritara og teljara

Fundarstjóri var kosinn Sólrún Björnsdóttir, Mosfells-sveitarklúbbsi. Tók hún við fundinum og skipaði sem fundarritara Arndísi Ellertsdóttur, Guðnýju Hinriksdóttur og Kristjönu Jónsdóttur úr Árbæjarklúbbsi. Teljarar voru Guðrún Helga Gylfadóttir og Sigríður Líba Ásgeirsdóttir úr Reykjavíkurklúbbsi. Ritari landssambandsstjórnar, Sigríður Baldursdóttir, Reykjavíkurklúbbsi, hafði því næst nafnakall fulltrúa.

2. Skýrslur stjórnar*a) Skýrsla forseta – Ásgerðar Kjartansdóttur*

Ásgerður greindi frá því að 476 konur væru í samtökunum en fækkað hafi um tvær. Tveir klúbbar urðu 25 ára á starfsárinu, Árbæjarklúbbur og Bakka- og Seljaklúbbur. Sagði hún frá því að landssambandið hafi látið útbúa nýjan vef, sem enn er í vinnslu, en stefnt er að opnun hans á haustfundinum að Reykjum. Norrænir vinadagar verða haldnir 6.-8. júní 2008 í Reykjavík. Mikil starfsemi fer fram innan klúbbanna og systur vinna óeigingjarnt starf. Fjáröflun er með ýmsu móti. Minntist Ásgerður á íslenska þýðingu á Program Focus Report, PFR eyðublaðinu, sem er að finna á vef samtakanna og á San Marco verkefnið en fé sem safnaðist var m.a. notað til að byggja upp fjölnotahús fyrir munaðarlaus börn í Kigali í Rúanda. Sigríður Þórarinsdóttir, Snæfellsnessklúbbsi, og fyrrum forseti, sér um þetta verkefni. Að lokum þakkaði Ásgerður stjórnarkonum fyrir gott samstarf.



Fyrrverandi, núverandi og verðandi forsetar landssambandsins

b) Skýrsla sendifulltrúa

– *Ingunnar Á. Sigurðardóttur og Margrétar E. Arnórsdóttur*
Flutti Ingunn skýrsluna og þakkaði fyrir sig en hún er að ljúka seinna starfsári sínu. Talaði hún um hið árlega friðarverkefni, 10. desember ákall alheimsforseta 2005, en greinin „Soroptimistar ráðast gegn Malaríu“ birtist í Fregnum nr. 78 í desember 2005. Kynnti hún kjörorð Evrópuforseta Monique Rivière „Friðarverkefni byggð á staðarhefð“ (Let us build peace through local heritage) sem birtist í Fregnum nr. 79 í mars 2006. Verður verkefnið kynnt á alþjóðafundinum í Glasgow í júlí 2007. Verðlaun munu verða veitt fyrir bestu verkefni. Ingunn minntist á friðarmaræðnið í Rúanda 2005 og 2006 sem útnefnt var sem besta verkefni soroptimista á sviði alþjóðlegrar vináttu og skilnings starfsárið 2005-2006. Skipuleggjendur verkefnisins voru mjög ánægðir með þátttöku íslenskra soroptimista en framlög okkar dugðu til að fjármagna boli og bakpoka með skólavörum fyrir 316 börn. Næsti sendifulltrúafundur verður haldinn í Toulouse í Frakklandi 12. maí nk. Þangað fara Ingunn Sigurðardóttir og Margrét Arnórsdóttir sendifulltrúar, Ásgerður Kjartansdóttir forseti, Hrafnhildur B. Sigurðardóttir varasendifulltrúi og Hafdís Karlsdóttir sem er í framboði til varaforseta Evrópusambandsins. Að lokum þakkaði hún samstarfið og sagði að starfið hafi verið sér dýrmæt reynsla.

c) Skýrsla gjaldkera – Elsu Hákonardóttur

Elsa las upp ársreikninga Soroptimistasambands Íslands fyrir fjárhagsárið 2005-2006. Þar kom meðal annars fram að heildartekjur voru kr. 5.532.231 og gjöld voru kr. 5.095.641. Hagnaður varð því kr. 436.590. Endurskoðendur voru Guðrún Pálsdóttir, Kópavogsklúbbi, og Mjöll Flosadóttir, Hafnarfjarðar- og Garðabæjarklúbbi.

3. Umræður og atkvæðagreiðsla um skýrslur stjórnar og sendifulltrúa

Enginn tók til máls og skýrslur voru samþykktar með öllum greiddum atkvæðum.

Nú var tekið gott hlé sem systur nýttu til samveru og spjalls inni og úti í sólinni um leið og þær drukku kaffi og gæddu sér á dýrindis kaffibrauði að hætti Akureyrarsystra.

4. Skýrslur nefnda og verkefnastjóra**a) Fastanefndir****Laganefnd**

Enginn var mættur úr nefndinni og því var engin skýrsla flutt.

Útbreiðslunefnd

Guðrún Erla Björgvinsdóttir, Bakka- og Seljaklúbbi, flutti skýrsluna. Hvatti hún til fjölgunar í klúbbum. Kom fram í máli hennar að lítið hafi gengið að fjölga systur en unnið væri að stofnun klúbba á Suðurlandi og í Húnavatnssýslu. Óskaði hún eftir ábendingum um konur til að bera upp.

Fjárhagsnefnd

Sigríður Svavarsdóttir, Skagafjarðarklúbbi, flutti skýrsluna. Gert er ráð fyrir tapi fyrir fjárhagsárið 2007-2008 en nefndin telur það í lagi vegna góðrar stöðu samtakanna. Nefndin veitir því hins vegar fyrir sér hvort tími sé kominn til að hækka félagsgjöldin. Fjárhagsáætlunin birtist í Fregnum nr. 82 í apríl 2007.

b) Skýrslur verkefnastjóra**Alþjóðleg vináttu og skilningur**

Lovísa Christiansen, Hafnarfjarðar- og Garðabæjarklúbbi, flutti skýrsluna og nefndi m.a. samskipti kvenna í Soroptimistaklúbbi Austurlands við erlendar konur og börn sem dvelja á Kárahnjúkum og taldi það verðugt verkefni. Einnig minntist hún á ferðaviku Hafnarfjarðar- og Garðabæjarklúbbs en klúbburinn fékk 46 gesti frá 18 löndum í heimsókn sumarið 2006.

Efnahags- og félagsleg þróun

Aðalbjörg Sigurðardóttir, Austurlandsklúbbi, las skýrslu Arnbjargar Sveinsdóttur úr sama klúbbi. Alls voru sendar út sex PFR skýrslur til að minna á friðarvinnu íslenskra soroptimista, þ.á.m. skýrsla um friðarkort íslenskra soroptimista sem landsambandið lét útbúa.

Heilbrigðismál

Laufey G. Baldursdóttir, Akureyrarklúbbi, flutti skýrsluna. Ein PFR skýrsla var send til verkefnastjóra Evrópusambandsins en hún var um fjáröflun Árbæjarklúbbsins. Klúbburinn afhenti nýverið Krabbameinsfélagi Íslands eina milljón króna til tækjakaupa. Akureyrarklúbbur hyggst taka þátt í stofnun líknardeildar á Akureyri og er undirbúningurinn kominn nokkuð á veg. Hafnarfjarðar- og Garðabæjarklúbbur gefur vistmönnum í Krísuvík jólagjafir og Seltjarnarnessklúbbur er með námskeið fyrir foreldra nýgreindra barna með einhverfu svo fátt eitt sé nefnt.

Mannréttindi og staða konunnar

Dagrún Þórðardóttir, Hóla- og Fellaklúbbi, flutti skýrsluna. Engin verkefni bærust sem tengjast þessu sviði en eitt verkefni er innan landsambandsins „Project independence“. Dagrún kom inn á það að brotið væri gegn mannréttindum erlends verkafólks og einnig telur hún að mansal eigi sér stað hér á landi. Hvetur systur til að vera á varðbergi gagnvart því.

Mennta- og menningarmál

Rannveig Thoroddsen, Bakka- og Seljaklúbbi, flutti skýrsluna. Alls voru sendar út fjórar PFR skýrslur á tímabilinu. Bakka- og Seljaklúbbur styður m.a. Fjölsmiðjuna í Kópavogi og nýtt verkefni þeirra er útgáfa ljóðabókarinnar Vigdísarljóð, en höfundur hennar er heiðursfélagi klúbbsins. Klúbbur veita námsstyrki, útskriftargjafir og ýmsa aðra styrki. Hvatti Rannveig systur til að skrá vinnustundir í sjálfböðastarfi og senda inn hugmyndir að verkefnum.

Umhverfismál

Elísabet Jóhannsdóttir, Akranessklúbbi, las skýrslu Hiltrudrar Hildar Guðmundsdóttur verkefnastjóra. Sex PFR skýrslur voru sendar til Evrópusambandsins. Verkefni allra klúbba var gróðursetning trjáplantna. Þrjár klúbbar tóku þátt í verkefninu „Vistvernd í verki“ í samvinnu við viðkomandi sveitarfélög um sjálfbæra þróun.

c) Ritstjórn Fregna

Skýrsluna flutti Sigríður Sveinsdóttir, Bakka- og Seljaklúbbi. Að venju komu út þrjú blöð á starfsárinu, vorblað, haustblað og jólablað. Sú nýbreytni hefur verið tekin upp í Fregnum að systur segja frá starfi sínu. Sigríður bað systur að segja álit sitt á breytingunum og blaðinu.

d) Sjóðanefnd

Jóhanna I. Sigmarsdóttir, Austurlandsklúbbi, flutti skýrsluna. Starfsemi var í lágmarki. Spurt var um úthlutun úr systursjóði sem er ætlaður til að styrkja systur í fjárhagserfiðleikum en engin umsókn barst.

e) Skólastyrkjanefnd

Sigrún Klara Hannesdóttir, Reykjavíkurklúbbi, flutti skýrsluna. Tvær umsóknir bárust fyrir árið 2007-2008. Íslensk kona, Kolbrún Árnadóttir, hlaut styrk fyrir skólaárið 2006-2007. Sigrún Klara sagði að starf skólastyrkjanefndar væri sérstaklega ánægjulegt þar sem umsækjendur væru einstaklega frambærilegir.

f) Önnur embætti**Nafnalistinn**

Sigríður Ágústsdóttir, Akureyrarklúbbi, umsjónarmaður nafnalista, flutti skýrsluna. Breytingar eru á starfsheitum systra í nýjasta nafnalistanum en verið er að samræma starfsheitið og því hafa sumar systur fengið nýtt starfsheiti. Ekki er lengur talað um að einhver sé „fyrirverandi“. Ef konur skipta um starf eða fara í nám þarf starfsheiti að vera samþykkt af starfsgreinaneftnd klúbbsins. Hvatti hún systur til að láta formann og ritara klúbbanna vita af öllum breytingum sem fyrst.

Hamraborg 10

Margrét Helgadóttir, Hafnarfjarðar- og Garðabæjarklúbbi, umsjónarmaður húsnæðisins, flutti skýrsluna. Nýting húsnæðisins var góð. Skráð var 131 heimsókn og 324 nafnaskráningar voru í gestabók. Sjö stjórnarfundir voru haldnar á vegum landssambandsstjórnar og einnig verkefnastjórnarfundir, fundir vegna vefsíðu og friðarkorta. Fjórar gistinætur voru skráðar og átta fundir embættismanna klúbba ásamt verkefnastjórnarfundum. Minnti Margrét konur á að skrifa í gestabók. Í janúar 2007 þrifu fimm systur húsnæðið hátt og lágt svo þar er nú allt skínandi hreint.

Project Independence

Ásgerður Kjartansdóttir, Reykjavíkurklúbbi, forseti landssambandsins og fóstta verkefnisins, flutti skýrsluna. Árið 2007 er lokaár fjögurra ára verkefnisins „Project Independence – Women Survivors of War“. Þakkaði hún stuðning við verkefnið sem fór fram úr björtustu vonum. Markmið Alþjóðasambands soroptimista hafði verið að safna 1.2 milljón dollara og í apríl 2007 væri talan komin upp í 1.241.000 dollara. Á Íslandi söfnuðust samtals 1.211.000 kr. eða 18.775 dollarar. Systur í tíu klúbbum stóðu í bréfaskriftum við níttján konur í Afganistan og voru íslenskar systur fyrstar innan Evrópasambands soroptimista til að hefja bréfaskriftir við konur í stríðshrjádum löndum. Verkefnið hefur haft bein áhrif á 45.000 konur í Afganistan, Bosníu og Rúanda. Ásgerður þakkaði systur fyrir góðar mót-tökur og framlög til verkefnisins og sagði að heimsóknir til klúbba hefðu gefið sér mikið.

Upplýsingafulltrúi

Kristín Einarsdóttir, Hafnarfjarðar- og Garðabæjarklúbbi, upplýsingafulltrúi, flutti skýrsluna. Sagði hún góðar skýrslur vera aflvaka soroptimista og geti vakið áhuga kvenna á að ganga í samtökin. Einnig geti fréttir af starfsemi klúbba verið gagnlegar. Sagði hún frá að í desemberhefti Fregna 2006 hafi

verið sagt frá kynningu Grafarvogssystra á starfsemi soroptimista. Í Morgunblaðinu í nóvember 2006 birtist heilsíðugrein með viðtali við Ásgerði Kjartansdóttur. Einnig sagði hún frá því að íslenskir soroptimistar muni verða með framsögu um kynbundið ofbeldi í Glasgow. Mun Ásgerður Kjartansdóttir forseti flytja hana.

Nú söng barnakór Akureyrarkirkju undir stjórn Arnórs Vilbergssonar fjögur lög. Kórinn er blandaður úr þremur kórum, drengjakór og barnakórum yngri og eldri barna. Lögin voru létt og skemmtileg og fékk Arnór söngstjóri systur til að taka undir í síðasta laginu.

Þá var gert matarhlé og hádegisverður borinn fram á Hótel KEA þar sem í boði var dásamlegur fiskréttur og notalegheit. Veður var yndislegt og lundin létt hjá fundarsystur.

5. Umræður og atkvæðagreiðsla um skýrslur í 4. lið**Fastanefndir:****a) Laganefnd, útbreiðslunefnd, fjárhagsnefnd**

Engin tók til máls um þessar nefndir. Gengið var til atkvæðagreiðslu um skýrslurnar og voru þær samþykktar einhljóða.

b) Verkefnastjórn

Sigríður Þórarinsdóttir, Snæfellsnessklúbbi, bað um orðið. Skoraði hún á konur að vanda verkefnaval. Erfitt væri að flokka skýrslurnar því þær væru margar og fínar. Varðandi hugleiðingar Dagrúnar Þórðardóttur skorar hún á allar konur að styðja við bakið á verkefnastjórn klúbbanna með því að vinna skýrslurnar af meiri nákvæmni. Láta allt koma fram, vinnustundir líka því það væri einnig mikilvægt. Skoraði hún á systur að standa þétt saman. Sigríður lýsti ánægju sinni með ritstjórn Fregna og að ritstjórnin færi milli klúbba. Mikill fjölbreytileiki kemur í ljós með því móti og eigum við ekki að vera feimnar við að vera öðruvísi. Allar ritnefndir fá þakkir fyrir störf sín. Vakti Sigríður athygli á systur í skólastyrkjanefnd, vildi hún æviráða þær. Umsóknir frá nefndinni hafa verið það góðar að Íslendingar hafa oft fengið styrki.

Sigrún Klara Hannesdóttir, Reykjavíkurklúbbi, þakkaði hrósið til skólastyrkjanefndar. Sigrún Klara nefndi að nýtt skýrsluform gæfi tækifæri til að setja skýrslur upp á nýjan hátt. Hugsa þarf um skýrslur sem verkefni með upphaf, miðhluta og endi og þarf að fylla út í öll atriðin. Ef við setjum skýrslur yfir í þetta form þá sést betur hvað við höfum lagt til starfsins. Benti hún á skýrslu Akureyrarklúbbsins sem reiknaði bókaútburð sinn út í krónum. Þá sýnum við meiri virkni en þetta kallar á nýja hugsun.

Ella Kolbrún Kristinsdóttir, Hafnarfjarðar- og Garðabæjarklúbbi, tók til máls og óskaði eftir meiri upplýsingum um þátttöku Íslendinga í verkefninu „Friðarverkefni byggt á staðarhefð“.

Fanney Ísfold Karlsdóttir, Skagafjarðarklúbbi, sagði að í skýrslu verkefnastjóra mennta- og menningarmála kæmi fram að Skagafjarðarklúbbur veitir stúlku í öllum þrem grunnskólum sýslunnar verðlaun fyrir lífsleikni í víðasta og besta skilningi

orðsins við útskrift í 10. bekk. Í skýrslu verkefnastjóra alþjóðlegrar vináttu og skilnings kom fram að það væri í annað skipti sem Skagafjarðarklúbbur bauð erlendum konum til kvöldverðar og samveru. Hið rétta væri að skýrslan næði yfir fyrsta skipti.

Jónína Guðjónsdóttir, Árbæjarklúbbi, furðaði sig á því að það vantaði mikið af verkefnum frá Árbæjarklúbbnum og spurði hvort skýrslur frá klúbbnum hefðu ekki skilað sér.

Steinunn Einarsdóttir, Seltjarnarnessklúbbi, greindi frá því að ágóði af sölu bókarinnar „Tilfinningar“ kosti námskeið sem klúbburinn hefur séð um fyrir foreldra nýgreindra barna með einhverfu.

Ásgerður Kjartansdóttir, landssambandsforseti, svaraði fyrirspurnum sem komið höfðu. Friðarverkefni núverandi Evrópuforseta „Friðarverkefni byggt á staðarhefð“ hefði verið kynnt í Fregnum en engin skýrsla féll undir þennan lið. Ætlar hún að kanna með skýrslur frá Árbæjarklúbbi en gat ekki fullyrt um neitt á þessari stundu. Mun hún því svara fyrirspurninni síðar.

Atkvæðagreiðsla um skýrslur

Skýrslur skoðuðust samþykktar með öllum atkvæðum.

6. Kosning forseta 2008-2010

Forseti: Guðrún Erla Björgvinsdóttir, Bakka- og Seljaklúbbi.

7. Stjórnarkjör

a) 1. varaforseti: Stella Olsen, Keflavíkurklúbbi.

b) Guðrún Erla kom í pontu og tilnefndi ritara með sér og þakkaði stuðning systra í klúbbnum sínum en alls var 21 systir úr klúbbnum stödd á Akureyri. Ritari 2008-2010 verður Snjólaug Sigurðardóttir, Bakka- og Seljaklúbbi.

8. Kosning sendifulltrúa og varasendifulltrúa

a) Sendifulltrúi:

Hrafnhildur Sigurðardóttir, Seltjarnarnessklúbbi.

b) Varasendifulltrúi:

Sigrún Klara Hannesdóttir, Reykjavíkurklúbbi.

9. Kosning fastanefnda og verkefnastjóra

a) Laganefnd: Kristín Norðfjörð, Bakka- og Seljaklúbbi, og Steinunn Einarsdóttir, Seltjarnarnessklúbbi.

b) Útbreiðslunefnd:

Ingunn Ásdís Sigurðardóttir, Skagafjarðarklúbbi.

c) Fjárhagsnefnd: Heiða B. Friðjónsdóttir, Hafnarfjarðar- og Garðabæjarklúbbi.

d) Verkefnastjóri heilbrigðismála:

Herdís Sveinsdóttir, Reykjavíkurklúbbi.

e) Verkefnastjóri umhverfismála:

Ellen Louise Tyler, Kópavogsklúbbi.

10. Kosning í önnur embætti

a) Sjóðanefnd:

Ragnheiður Gunnbjörnsdóttir, Akureyrarklúbbi.

b) Endurskoðandi:

María Lóa Friðjónsdóttir, Skagafjarðarklúbbi.

c) Umsjón nafnalista:

Sigríður Ágústsdóttir, Akureyrarklúbbi, var endurkjörin.

d) Upplýsingafulltrúi: Kristín Einarsdóttir, Hafnarfjarðar- og Garðabæjarklúbbi, var endurkjörin.

11. Tillögur og áætlanir

Engar tillögur og áætlanir bárust.

12. Mál sem stjórnin leggur fram

Elsa Hákonardóttir, Mosfellssveitarklúbbi, gjaldkeri landssambandsins, flutti tillögu um stofnun verkefnasjóðs Soroptimistasambands Íslands til styrktar einhverju ákveðnu málefni, innanlands eða utan. Sjóðurinn verður fjármagnaður þannig að af 500 króna framlagi hverrar systur, sem fram til þessa hefur farið í 10. desember verkefni forseta Alþjóðasambands soroptimista, fari 200 krónur í verkefnasjóð landssambandsins en 300 krónur í 10. desember sjóð alþjóðaforseta. Þegar að úthlutun úr sjóðnum kemur mun stjórn Soroptimistasambands Íslands koma með tillögu um hvaða málefni skal styrkja og verður tillagan lögð fyrir fulltrúaráð.

Meginástæðan fyrir þessari tillögu er sú að raddir hafa heyrst meðal systra um að verðugt væri að stofna verkefnasjóð á vegum Soroptimistasambands Íslands til styrktar einhverju ákveðnu málefni. Gott væri styrkja innlend verkefni og gætum við þannig verið sýnilegri á innlendum vettvangi. Sjóðurinn yrði byggður upp á næstu 2-3 árum og síðan notaður til innlendra eða erlendra verkefna. Upphæðin í 10. des. sjóðinn var í upphafi miðuð við verð á sigarettupakka og velti Elsa því upp hvort ekki væri tímabært að hækka gjaldið til samræmis við verð á sigarettupakka í dag.

Óskað var eftir hvort einhver vildi taka til máls um þessa tillögu og fjárhagsáætlun. Ella Kolbrún Kristinsdóttir, Hafnarfjarðar- og Garðabæjarklúbbi, kom með breytingartillögu um að ný sjóðurinn yrði merktur Íslandi og styrkirnir færu til Íslands til að fólk vissi hvað við værum að gera hér á landi.

Björk Hreinsdóttir, Seltjarnarnessklúbbi, taldi gott að skipta þessu svona en fannst of bindandi að einskorða við íslensk verkefni. Lagði hún til að hafa upphæðina til íslenska sjóðsins hærrí, að 300 kr. færu til innlendra verkefna en 200 kr. í 10. des. sjóðinn.

Kristjana Björnsdóttir, Austurlandsklúbbi, var sammála því að 300 kr. gengu til innlendra verkefna og 200 kr. rynnu í 10. desember sjóðinn. Jafnframt vildi hún að orðalagi yrði breytt þannig að verkefnasjóðurinn rynni fyrst og fremst til innlendra verkefna.

Ingunn Sigurðardóttir, sendifulltrúi, úr Skagafjarðarklúbbi, kvaðst hafa orðið vör við að margar erlendar systur hefðu tekið eftir því hversu gjafmildar við værum á Íslandi. Var hún ánægð með þessa tillögu en vildi ekki rígnegla niður að þetta væri

einungis til innanlandsmála því að það gætu komið upp aðstæður erlendis þar sem taka þyrfti skjótar ákvarðanir. Vildi hún gjarnan hafa hlutfallið 300/200 eins og tillagan er borin upp til þess að ekki yrði mikil umræða erlendis vegna breyttinganna.

Elísabet Jóhannsdóttir, Akranessklúbbi, studdi stofnun þessa verkefnasjóðs en taldi að ekki þyrfti að negla niður hvert styrkurinn ætti að renna. Taldi hún landssambandsstjórn fyllilega færa um að vega og meta úthlutun úr sjóðnum.

Sólrún Björnsdóttir, fundarstjóri, bar nú upp breytingartillögu nr. 1 og 2:

Breytingatillaga nr. 1: 300 kr. renni í verkefnasjóð Soroptimistasambands Íslands og 200 kr. í 10. desember sjóð alþjóðaforseta. Tillagan var felld.

Breytingatillaga nr. 2: Nýi verkefnasjóðurinn notist eingöngu til verkefna innanlands. Tillagan var felld.

Sólrún Björnsdóttir, fundarstjóri, bar nú upp hina upphaflegu tillögu landssambandsstjórnar og var hún samþykkt með miklum meirihluta atkvæða.

Fjárhagsáætlun var borin upp og hún var samþykkt samhljóða.

13. Mál sem borist hafa

Engin mál höfðu borist.

14. Ákvörðun um næsta landssambandsfund

Guðrún Blöndal, formaður Árbæjarklúbbs, bauð allar systur velkomnar til næsta landssambandsfundar í Árbænum 19. apríl 2008.

15. Önnur mál

Kynning á nýjum vef Soroptimistasambands Íslands
 Ásgerður Kjartansdóttir kynnti. Systur úr tveimur klúbbum hafa unnið undirbúningsvinnu við vefinn, þær Guðfinna B. Kristjánsdóttir, Halla Björg Baldursdóttir og Kristín Einarsdóttir úr Hafnarfjarðar- og Garðabæjarklúbbi og Sigríður Líba Ásgeirsdóttir, Sigríður Baldursdóttir og Ásgerður Kjartansdóttir úr Reykjavíkurklúbbi. Þær hafa unnið að vefnum frá því í október. Unnin var þarfagreining og gengið út frá því að hafa vefinn einfaldan og auðveldan í notkun og þannig gerðan að nokkrir aðilar gætu sett inn efni en ekki bara ein manneskja eins og verið hefur til þessa. Gert er ráð fyrir almennum vef (ytri vef), lokuðum vef (innri vef) og lokuðum vef fyrir klúbba (klúbbavef). Stefnt er að því að hafa félagatal með myndum á vefnum þannig að jafnvel verði hægt að útrýma prentuðum nafnalista með tíð og tíma ef vilji verður fyrir því. Á vefnum verður einnig svæði fyrir myndir og svo ýmsar upplýsingar um samtökin o.fl. Hugbúnaður fyrir vefinn er keyptur hjá EC-Software. Hönnun og veftré liggur fyrir og sýndi Ásgerður sýnishorn af væntanlegum síðum. Stefnt er að opnun vefsins á haustfundi að Reykjum. Þetta er með stærri verkefnum sem unnið var að hjá landssambandinu í vetur. Fyrirspurn barst utan úr sal um hvort ekki mætti hafa Fregnir á vefnum og sagði Ásgerður að svo væri nú þegar og gætu konur lesið blaðið þar.

Kynning á verkefninu „Ökum varlega“

Laufey Hannesdóttir, Hóla- og Fellaklúbbi, upphafsmaður verkefnisins, kynnti það.

Nokkrar konur hafa hist og undirbúið verkefnið, þær eru auk Laufeyjar, Sigríður Líba Ásgeirsdóttir og Guðrún Helga Gylfadóttir, Reykjavíkurklúbbi, Elín Aðalsteinsdóttir, Árbæjarklúbbi, Þórlaug Guðbjörnsdóttir, Seltjarnarnessklúbbi, Kristín Jónasdóttir, Bakka- og Seljaklúbbi, og Sigrún Skaftadóttir, Hóla- og Fellaklúbbi.

Laufey lagði áherslu á að við værum breiðfylking kvenna, systur sem gætum haft áhrif. Hefur hópurinn áhuga á að fá systur til samstarfs um að bæta umferðarmenningu því að við getum haft áhrif á eiginmenn, syni, dætur, vini o.fl. Lagði hún áherslu á persónulegt samband systra við sína nánustu. Þetta væri ekki auglýsing heldur persónulegt samtal sem við mundum eiga við vini okkar og kunningja. Búist er við að hver systir geti rætt við 50 aðila = 400 x 50 = 20.000. Þannig náum við 20.000 manns. Verkefnið flokkast undir umhverfismál og hófst á síðasta haustfundi þar sem Laufey ræddi við systur. Vinnuhópurinn er búinn að fá stuðningsaðila sem er VÍS tryggingafélag. Ekki tókst að ljúka verkefninu núna en því verður lokið fyrir haustið. Sigríður Líba bjó til merki sem er eins og bíll í laginu. Útbúin verður lykklakippa með merkjum á báðum hliðum bílsins, jákvæð merki öðrum megin en neikvæð hinum megin. Einnig verða hannaðir límmiðar. Laufey óskaði eftir að konur réttu upp hönd ef þær vildu tala við fólk, eftir haustfund, og réttu allar upp hönd. Kristín Einarsdóttir, Hafnarfjarðar- og Garðabæjarklúbbi, upplýsingafulltrúi, mun aðstoða við að koma upplýsingum til fjölmíðla.

Hólfríður Pálsdóttir úr Kópavogsklúbbi átti afmæli. Fékk hún sendan blómvönd frá aðdáanda inn á fundinn og var afmælissöngurinn sunginn fyrir hana.

Búið er að þýða soroptimistasönginn, þ.e. ákallið, á ensku. Kristjana Björnsdóttir, Austurlandsklúbbi, kynnti að það hefði gert Þórhallur Hróðmarsson í Hveragerði en systir hans Anna S. Hróðmarsdóttir er í Skagafjarðarklúbbum. Kristjana bauð ákallið til sölu á plöstuðu spjaldi á 500 kr. Ágóðinn mun renna til friðarverkefna.

Kynning á fræðsluhefti

Sigríður Þórarinsdóttir, Snæfellsnessklúbbi, kynnti fræðsluhefti fyrir soroptimista í Evrópusambandi soroptimista sem Kirsten Sveder, 1. varaforseti Evrópusambandsins, hefur tekið saman. Kirsten vantaði handhægt efni sem hún gæti notað til kynningar þegar unnið væri að stofnun nýrra klúbba. Hafði hún samband við öll landssambönd og fékk efni. Útbjó síðan fræðsluefni sem þýtt var á íslensku af þeim Sigríði Þórarinsdóttur og Kristínu Einarsdóttur. Fyrst var ætlunin að þýða heftið og sameina handbók soroptimista en frá því var horfið því handbókin er ítarlegri. Fræðsluheftið er einfaldara og ætlað að höfða til þeirra sem ekki þekkja til hreyfingarinnar. Í heftinu er farið yfir verksvið alþjóðasambandsins, Evrópusambandsins, landssambanda og klúbba. Fjallað er um skýrslugerðir o.fl. Greint er frá því í hvað félagsgjöldin fara, sagt frá Program Focus Report og hvert ferlið er í skýrslugerðum og framkvæmd þeirra. Aftast er hugtaka- og skammstafanaskrá.

Allir formenn hafa fengið fræðsluheftið sent. Verður það sett á vef sambandsins og uppfært og endurbætt eftir því sem þörf krefur. Sigríður endaði á orðunum „útbreiðsla er á abyrgð allra soroptimista“.

Hildur Hálfðanardóttir, Kópavogsklúbbi, tók til máls. Hún var með skilaboð frá tveimur systur í Litháen sem komu á ferðaviku hjá Hafnarfjarðar- og Garðabæjarklúbbnum. Eru þær að fara af stað með sams konar ferðaviku í Litháen 9.-17. ágúst. Hildur sagðist hafa farið til Litháen og mælti með því ef einhverjar hefðu áhuga. Hildur er í útbreiðslunefnd en nefndin hefur verið með klúbb á Suðurlandi í undirbúningi lengi. Það hún konur sem þekkja einhverjar sem búa þar að láta útbreiðslunefnd vita. Það vantar herslumuninn til að hægt verði að ljúka verkefninu.

Hafdís Karlsdóttir, Kópavogsklúbbi, tók til máls. Hrósaði hún Fregnum. Sagði hún blaðið skemmtilegt, uppsetning og framsetning þess væri góð en fannst vanta birtingu skýrslna. Greint var frá að þær væri hægt að nálgast á innri vef sambandsins. Hafdís taldi að það mætti hækka félagsgjöld, t.d. vegna hækunar evrunnar á næsta ári. Það allar að hugleiða það. Þó væri ekki bráð þörf á því núna.

Lára Ingibjörg Ólafsdóttir, Mosfellssveitarklúbbi, tók til máls. Vill hún ekki missa nafnalista í bókarformi en segir að vefurinn sé velkominn sem viðbót.

Margrét Eyfells, formaður Akureyrarklúbbsins, tók til máls. Þakkaði hún konum fyrir dásamlegan dag, þakkaði konum fyrir komuna og fyrir að sýna að það væri hægt að slá aðsóknarmet. Þakkaði hún að lokum klúbbsystur sínum fyrir alla vinnuna sem þær lögðu fram.

Sigríður Sveinsdóttir, Bakka- og Seljaklúbbi, annar ritstjóri Fregna, tók nú til máls. Þakkaði hún Hafdísi fyrir hrósið um Fregnir. Góð og falleg orð gefa mikið og mun hún skila þessu til systra sinna. Sagði hún að það væri metþátttaka á landsambandsfundinum en einnig hefði annað met verið slegið, skv. ábendingu frá Hafdísi Karlsdóttur. Á fundinum væru átta konur sem hafa verið forsetar, ásamt núverandi og verðandi forseta. Þetta eru forsetar frá árinu 1988 til ársins 2010 að einum undanskildum. Það hún um að fá mynd af þeim og var orðið við þeim óskum.

Ásgerður minnti á könnun um framtíðarskipulag soroptimista sem er á vef Alþjóðasambands soroptimista. Einnig skýrði hún frá því að á alþjóðþinginu í Glasgow í júlí væri beðið um að konur mættu síðasta daginn í hvítum bolum eða skyrtum og með bangsa með sér. Það á að mynda bangsafjall og gefa bangsana í þágu friðar.

Síðan kallaði Ásgerður upp þær systur sem gengu úr stjórn og nefndum og þakkaði þeim fyrir vel unnin störf og framlag í þágu systra og afhenti þeim þakkarkort og bókina „Snjallyrði, tilvitnanir og spakmæli“ að gjöf. Eftirtaldir systur voru viðstaddar; Edda Jóhannsdóttir, Hafnarfjarðar- og Garðabæjarklúbbi, 1.varaforseti; Ingunn Sigurðardóttir, Skagafjarðarklúbbi, sendifulltrúi; Laufey Baldursdóttir, Akureyrarklúbbi, verkefnastjóri heilbrigðismála; Guðrún Erla Björgvinsdóttir, Bakka- og Seljaklúbbi, formaður útbreiðslunefndar; Sigríður

Svavarsdóttir, Skagafjarðarklúbbi, formaður fjárhagsnefndar; Jóhanna I. Sigmarsdóttir, Austurlandsklúbbi, formaður sjóðanefndar, og Guðrún Pálsdóttir, Kópavogsklúbbi, endurskoðandi.

Fjarstaddar voru en fengu góðar kveðjur og þakkir: Esther Hermannsdóttir, Akranessklúbbi, laga- og reglugerðanefnd; Sveinborg Hermannsdóttir, Akranessklúbbi, laga- og reglugerðanefnd, og Hiltrud Hildur Guðmundsdóttir, Akranessklúbbi, verkefnastjóri umhverfismála.

16. Bryndís Björg Þórhallsdóttir hjúkrunarfræðingur: Líknandi meðferð og þátttaka Soroptimistaklúbbs Akureyrar í uppbyggingu líknardeildar á Akureyri

Bryndís gerði grein fyrir sér og högum sínum. Hún er félagi í Akureyrarklúbbi og lauk prófi í hjúkrunarfræði 1997. Bryndís hefur unnið mest við líknandi meðferð og nú í sjö ár við heima-hlyningu með fólk sem haldið er erfiðum sjúkdómum. Sagði hún að hugmyndafræði um líknandi meðferð fyrir sjúklunga hafi breyst mikið sl. 40 ár. Hún hafi verið þróuð og hrundið í framkvæmd fyrst og fremst fyrir krabbameinssjúklunga. Líknandi meðferð er heilðræn umönnun sjúklings með lífsógnandi sjúkdóm þegar lækningu verður ekki lengur komið við. Líkamleg, andleg og félagsleg vandamál eru tengd saman. Meðferð er nú færð framár í sjúkdómsferli en það kemur í veg fyrir erfið síðkomin einkenni, andleg og líkamleg. Meðferðin er ekki ein-skorðuð við krabbameinssjúklunga heldur er hún einnig notuð til að hjálpa þeim sem þjást af t.d. MS, MND, alnæmi og hjarta- og lungnasjúkdómum. Líknandi meðferð miðar að því að bæta lífsgæði sjúklunga og fjölskyldna þeirra sem takast á við lífshættulega sjúkdóma. Meðferðin hefst við greiningu en nær hámarki við lífslok og heldur áfram við andlát en fjölskyldunni er fylgt eftir. Er þetta teymisvinna sjúkrapjálfa, iðjupjálfa, presta, hjúkrunarfræðinga og lækna sem vinna saman. Mikil þörf er fyrir líknandi meðferð og sífellt algengara að fólk vilji deyja heima. Fólk finnst oft að líknardeild sé endastöð en nú er hún einnig notuð fyrir hvíldarinnlögn. Tvær líknardeildir eru starfandi á landinu, í Kópavogi og Reykjavík. Engin deild er á



Bryndís Björg Þórhallsdóttir, hjúkrunarfræðingur

Akureyri ennþá en stofnað hefur verið sjálfstætt félag, Bjarni líknarfélag ehf., sem er einkahlutafélag um uppbyggingu húsnæðis fyrir líknardeild við Fjórðungssjúkrahúsið á Akureyri (FSA). Hönnun er komin vel á veg og verður deildin fyrst í stað ætluð fyrir 6 sjúklinga. FSA mun sjá um reksturinn. Í gangi eru viðræður við Heimahlyningu Eyjarfjarðar ehf. um að hún taki þátt í verkefninu. Soroptimistaklúbbur Akureyrar mun koma að þessu verkefni og styðja við starfsemina sjálfa með tækja-kaupum og sjálfbóðastarfi.

Umræður um erindið

Sigrún Klara Hannesdóttir spurði hversu áhrifaríkt það væri að breyta heitinu og hugmyndafræðinni að baki því. Bryndís sagði það mjög áhrifaríkt en það þyrfti að fylgja því vel eftir. Sigríður Baldursdóttir spurði hvort Soroptimistaklúbbur Akureyrar kæmi að verkefninu með fjárframlögum eingöngu eða á áþreifanlegan hátt líkt og hjá bókasafninu. Bryndís sagði að systur í Akureyrarklúbbsi mundu einnig taka þátt í verkefninu með beinu vinnuframlagi. Síðan þakkaði Bryndís fyrir sig og góðar undirtektir.

17. Forseti slítur fundi

Ásgerður Kjartansdóttir, forseti landssambandsins, þakkaði Bryndísi fyrir mjög fróðlegt erindi. Hún kallaði síðan Margréti Eyfells, formann Akureyrarklúbbsins, til sín og sagði að forseti sambandsins gæti á hverju starfsári veitt verðugu verkefni fjárstuðning að upphæð 150 þúsund krónur. Að þessu sinni hefði forseti ákveðið að þátttaka Soroptimistaklúbbs Akureyrar

í uppbyggingu líknardeildar á Akureyri verðskuldaði stuðning sem mjög gott verkefni. Forseti afhenti síðan Margréti Eyfells gjafabréf þessu til stuðnings og bað þess að blessun fylgdi starfseminni. Forseti þakkaði því næst Sólrúnu Björnsdóttur fyrir skelegga og góða fundarstjórn og færði henni bókina „Snjallyrði, tilvitnanir og spakmæli“ í þakklætisskyni. Færði hún að lokum fundarriturum kærar þakkir fyrir þeirra störf og þakkaði öllum systurum innilega fyrir samveruna og fundarsetuna.

Allar tímaáætlanir stóðust og forseti sleit fundi kl. 16:04.

Arndís Ellertsdóttir, Guðný Hinriksdóttir og Kristjana Jónsdóttir, fundaritarar, Árbæjarklúbbsi



Forseti afhendir formanni Akureyrarklúbbs styrk



Dagskrá haustfundar

að Reykjum í Hrótafirði 5. - 7. október 2007

Föstudagur 5. október 2007

19:00-22:00 Skráning
Samvera á vistinni og heilsað upp á systur

Laugardagur 6. október 2007

08:30-09:00 Skráning
09:00-09:15 Forseti setur fundinn
09:15-10:45 Fréttir af soroptimistastarfi

- Sendifulltrúafundur í Toulouse
- Stjórnarfundur Alþjóðasambandsins í Glasgow
- Alþjóðáþingið í Glasgow

10:45-11:00 Framtíðarsýn Alþjóðasambands soroptimista
11:00-11:15 San Marco verkefnið í Kigali
11:15-11:30 Nýr vefur Soroptimistasambands Íslands opnaður
11:30-12:00 Verkefnið „Ökum varlega“
12:00-13:00 Hádegisverður
13:00-13:30 Önnur mál og umræður
13:30-14:30 Kynning á verkefnakjarna (Program Focus) 2007-2011

14:30-16:00 Árangursrík verkefnastjórnun

Námskeið í umsjón Sigrúnar Klöru Hannesdóttur, Reykjavíkurklúbbsi. Fjallað verður um aðferðir við að móta hugmyndir yfir í vel skilgreind verkefni með upphaf og endi. Tilgangur námskeiðsins er að auðvelda soroptimistum að skipuleggja verkefni og að gera grein fyrir starfsemi sinni í samræmi við kröfur um skýrslugerð og meiri skilvirkni.

Hlé

19:00- Hátíðarkvöldverður og skemmtidagskrá

Sunnudagur 7. október 2007

10:30-12:00 Hópstjórar leiðbeina embættismönnum með aðstoð handbóka

Klúbbformenn athugið að nauðsynlegt er að embættismenn klúbba eða fulltrúar mæti á fundinn. Hver klúbbur er skuldbundinn til að greiða fyrir þær klúbb-systur sem eru skráðar en mæta ekki.

Dagskráin er birt með fyrirvara um breytingar

Sendifulltrúafundurinn í Toulouse 12. og 13. maí 2007



Ágrip úr skýrslu sendifulltrúa, en hana má finna í heild sinni á heimasíðu SI/E, www.soroptimist.is/innri

Fundurinn fór fram dagana 12. og 13. maí 2007 í Toulouse í Suður-Frakklandi. Alls sátu fundinn rúmlega 150 konur. Atkvæðisrétt, auk stjórnar Evrópusambandsins (SI/E), höfðu sendifulltrúar frá 31 landssambandi.

Málfrelsi og tillögurétt höfðu fulltrúar 26 klúbba frá löndum án landssambanda, varasendifulltrúar og forsetar landssambanda. Fundinn sátu, af Íslands hálfu, Ingunn Ásdís Sigurðardóttir og Margrét E. Arnórsdóttir, sendifulltrúar, Hrafnhildur B. Sigurðardóttir, varasendifulltrúi, Ásgerður Kjartansdóttir, forseti landsambandsins, og Hafdís Karlsdóttir, sem var í kjöri til varaforseta stjórnar SI/E.

Helstu dagskrárlíðir og ákvarðanir fundarins:

Monique Rivière, forseti SI/E, setti fundinn og stýrði honum. Að loknum hefðbundnum liðum í upphafi var gengið til dagskrár.

Kosningar

Kjósa skyldi til allra embætta í stjórn SI/E nema gjaldkera, en Huberta Colbus-Gross var endurkjörin sl. ár.

Forseti sambandsins 2007-2009, Mariet Verhoef-Cohen frá Hollandi, var kosin fyrir 2 árum og hefur síðan starfað með stjórninni sem verðandi Evrópusambandsforseti.

Forseti SI/E 2009-2011. Kosningu hlaut Eliane Lagasse frá Belgíu.

1. og 2. varaforseti 2007-2009. Þrjár konur voru í framboði. Hafdís okkar Karlsdóttir fékk flest atkvæði og verður því



Ásgerður, Ingunn, Mariet, Hafdís, Hrafnhildur og Margrét á sendifulltrúafundi

1. varaforseti en Nilgün Ozler frá Tyrklandi varð í öðru sæti og verður 2. varaforseti. Þessi atkvæðagreiðsla var ævispennandi en fundarkonur fögnuðu niðurstöðunni og samglöddust okkur. Hamingjuóskum rigndi yfir Hafdís og margar myndir teknar. Hún er fyrst Íslendinga til að skipa þetta embætti, en móðir hennar, Hildur Hálfðanardóttir, hefur gegnt embætti 2. varaforseta SI/E.

Ritari sambandsins 2007-2009. Ritari er tilnefndur af forseta og var Gerda Huisman frá Hollandi tilnefnd og samþykkt.

Laganefnd 2007-2009. Kjósa átti 3 konur en aðeins 1 var í framboði, Popi Athanassiou frá Grikklandi, og var hún kjörin. Framboð vantaði fyrir hin tvö sætin í nefndinni og var framboðsfrestur framlengdur. Nú, í ágústlok, stendur yfir bréfkosning.

Útbreiðslunefnd 2007-2009. Ulla Madsen frá Danmörku var endurkjörin. Kosningu hlutu einnig Jaana Helena Simpanen frá Ítalíu og Leena Viitaniemi frá Finnlandi.

Fjármálaeftirlit 2007-2009 (hét áður Fjárhagsnefnd). Í bréfkosningu í sumar var Mariana Abrantes de Sousa kjörin.

Skólalstyrkjanefnd 2007-2009. Kosningu hlutu Edith Müller-Merz frá Sviss (endurkosning), Joanna Styrchacka-Witt frá Póllandi og Gerd Wold Goddard frá Noregi.

Verkefnastjóri efnahags- og félagslegrar þróunar 2007-2009. Marie-Noëlle Journou frá Frakklandi var sjálfkjörin.

Verkefnastjóri mennta- og menningarmála 2007-2009. Jadwiga Teresa Stepién frá Póllandi var sjálfkjörin.

Verkefnastjóri umhverfismála 2007-2009. Þegar þetta er ritað stendur yfir bréfkosning milli 3 frambjóðenda.

Verkefnastjóri heilbrigðismála 2007-2009. Þegar þetta er ritað stendur yfir bréfkosning milli 5 frambjóðenda.

Verkefnastjóri mannréttinda og stöðu konunnar 2007-2009. Kosningu hlaut Silvia Grandi Dazzi frá Ítalíu.

Verkefnastjóri alþjóðlegrar vináttu og skilnings 2007-2009. Kosningu hlaut Anne-Christine Söderlund frá Svíþjóð.

Úr skýrslu Monique Riviére, forseta

Á síðasta fundi stjórnar alheimssambandsins var samþykkt að gera breytingu á framlagi sambandsins til heimhlutasambandanna vegna útbreiðsluverkefna. Hingað til hafa þau öll fengið sömu upphæð sem ákveðin var fyrirfram fyrir hvert starfsár en frá og með 30. júní 2007 þarf að sækja um styrk fyrir hvert fyrirhugað verkefni og koma þarf fram hvaða/hvernig árangurs er vænst á næstu 2 árum.

Heidrun Konrad er fulltrúi SI/E í nefnd sem vinnur að mótun framtíðarsýnar, „Strategic Plan“, fyrir soroptimista-samtökin.

Innsendum verkefnaskýrslum „Program Focus Reports“ (PFR) hefur fjölgað mikið en athygli og áhyggjur vekur hversu fáar berast af sviði umhverfismála.

Kirsten Sveder hafði umsjón með útgáfu nýrrar handbókar soroptimista og hefur síðan séð um námskeið um starfsemi þeirra, byggð á efni bókarinnar.

Landssamband Fílabeinsstrandar (Ivory Coast) hefur verið lagt niður, þar voru aðeins starfandi 2 klúbbar.

Úr skýrslu Eliane Lagasse,**1. varaforseta**

Þriðja friðarmarabonið í Rúanda var haldið 13. maí 2007, síðari dag sendi-fulltrúafundarins. Árið 2005 voru þátttakendur 1600, árið 2006 tóku þátt 2000 hlauparar frá 24 löndum og í ár var áætlað að um 2500 manns hlypu. Í tengslum við hlaupið hafa soroptimistar og fleiri styrkt margvísleg verkefni í þágu rúandískra kvenna og barna.

Úr skýrslu Kirsten Sveder,**2. varaforseta**

Ný handbók soroptimista hafði í byrjun árs verið þýdd á 17 tungumál. Mikill áhugi hefur verið á handbókinni og ekki síður á námskeiðunum. Hugmyndin með þeim er að leiða saman fulltrúa „gamalla“ sambanda, „ungra“ sambanda og klúbba utan sambanda til að læra hver af öðrum og handbókinni og mynda með því „friðarbrýr“ í anda alþjóðlegrar vináttu og skilnings. Í maí höfðu 5 námskeið verið haldin og 3 til viðbótar skipulögð fyrir haustið með u.þ.b. 700 þátttakendum.

Um 50 verkefnaskýrslur höfðu borist fyrir starfsárið. Kirsten lagði áherslu á að við konur þyrftum að vera miklu meðvitaðri um gildi verkefna okkar og þann mikla

og góða árangur sem af þeim verður. Soroptimistar vinna frábært starf en við erum afleitar við að koma árangrinum á framfæri. Hún brýnir konur til að senda inn upplýsingar um verkefni „en ekki að halda þeim leyndum“. Það sé auðvelt að fylla eyðublaðið út á vefnum. Á vefnum okkar er PFR eyðublaðið á íslensku:

www.soroptimist.is/eydublod/PFR_2007-2009_skyrsluform_islenska.doc

Úr skýrslu Hubertu Colbus-Gross, gjaldkera

Innheimta félagsgjalda, kostar oft mikinn eftirrekstur. Hún leggur áherslu á að verkefni gjaldkera séu mjög áhugaverð en tímafrek. Eftir síðasta uppgjör voru 58.000 evrur í Viðlagasjóði (Action Fund), 72.000 evrur í Skólalagssjóði og tæplega 179.000 evrur í Samstöðusjóði (Solidarity Fund) til ráðstöfunar fyrir úthlutanir úr sjóðunum tímabilið 2007-2008.

Úr skýrslu Heidrun Konrad, fráfarandi forseta

Verkefni hennar eru fjölmörg:

1. Yfirumsjón með vef SI/E.
2. Umsjón með tölvusamskiptum sambandsins (50-90 bréf á dag).
3. Umsjón með undirbúningi að veitingu friðarverðlauna SI/E 2007.
4. Fylgist með verkefninu „Open Heart – Open Door“ sem gengur mjög vel. Á skrá eru nú nöfn á þriðja hundrad þátttakenda í 28 löndum.
5. Er fulltrúi SI/E í nefnd um framtíðarsýn soroptimista.

Þegar reikningum frá Evrópusambandsforsetatið hennar var lokað var ágóði 334 þúsund evrur. Helstu ástæður þessa rekstrarafgangs er hagnaður af Evrópusambandsfundinum í Vín 2005 og að öll stjórnin var mjög meðvituð um að spara á öllum hugsanlegum sviðum. Heidrun lagði fram tillögur um hvernig þessum afgangi skyldi ráðstafað og rökstuddi þær allar mjög vel. Sjá nánar á vef SI/E. Þessar tillögur voru allar samþykktar.

Úr skýrslu Cristine Dagain, ritara sambandsins

Aðaláhugamál hennar og verkefni hefur verið að styrkja ímynd samtakanna og gera þau sýnilegi út á við. Til þess þarf að nýta veraldarvefinn og ná athygli fjölmiðla.

Unnið hefur verið að endurbótum á heimasíðu samtakanna með það að markmiði að gera störf og ásýnd þeirra aðlaðandi og áhugaverð fyrir ungar konur. Á heimasíðu SI/E má nú finna „a standard press kit“, sem er leiðsögn um hvernig koma megi verkefnum á framfæri við fjölmiðla. Hún hvetur til vakningar um nauðsyn betri kynningar á störfum okkar.

Úr skýrslu Marie-Irene Paleologue, framkvæmdastjóra skrifstofu SI/E

Verkefni starfsfólks skrifstofunnar eru mjög umfangsmikil. Í byrjun júlí 2007 er sérstakur fundur um málefni skrifstofu samtakanna, m.a. með tilliti til umræðna um staðsetningu hennar.

Marie-Irene lagði áherslu á að eitt helsta vandamál skrifstofunnar væri hve mörg landssambönd og klúbbar virtu ekki lokadagsetningar ýmissa verkefna, sem standa ætti skil á upplýsingum um, eða brygðust ekki við þegar kallað væri eftir upplýsingum frá þeim. Mjög brýnt væri að bæta úr þessu.

Úr skýrslu Mariet Verhoef-Cohen, verðandi forseta

Hún hefur verið tengiliður SI/E við Alheimssamband soroptimista.

Verkefninu „Project Independence - Women Survivors of War“ er nú að ljúka og hefur það gengið mjög vel. Markmiðið var að safna 1,2 milljón dollurum til verkefnisins, en upphæðin stefnir nú í 2 milljónir dollara.

Undir merkjum „Five-O“ er unnið að nokkrum verkefnum sem ganga út á að hjálpa og þjálfar konur til virkari þátttöku í samfélaginu. Þau ganga vel.

Mariet hvetur soroptimista til að skipuleggja uppákomur á alþjóðabaráttudegi kvenna, 8. mars, og bendir á að þá sé kjörið tækifæri til að vekja athygli á samtökum okkar.

Skýrslur stjórnarkvenna voru allar samþykktar.

Tillaga frá austuríska sambandinu um að sambönd og klúbbar sendu hvatningarbréf til landsstjórna sinna um að þær innleiddu samninga Evrópuráðsins um aðgerðir gegn mansali var samþykkt.

Innskot: Þetta mál hefur þegar verið tekið til umfjöllunar á Alþingi Íslendinga.

Fjármál

Viðlagasjóður (*Action Fund*).

Alls var úthlutað styrkjum til 13 klúbba að þessu sinni.

1. Agadir í Morocco fékk 5.275 evrur til að dreifa námsgögnum til vanrækra barna.
2. Alliance Tombouctou á Mali fékk 4.000 evrur til að senda 5 konur í læknismeðferð.
3. Raseiniai í Litháen fékk 6.000 evrur til að aðstoða konur sem hafa orðið fyrir heimilisofbeldi.
4. Petrozavodsk í Rússlandi fékk 2.500 evrur til að styðja munaðarlausar unglingsstúlkur til menntunar.
5. Madagascar fékk 4.000 evrur til að berjast gegn brjóstakrabbameini.
6. Burck/Mur í Austurríki fékk 3.000 evrur til að aðstoða við menntun kvenna í Rubik í Albaníu.
7. Friesland Zuid í Hollandi fékk 4.250 evrur til að útbúa og dreifa upplýsingabæklingi um söfnun rigningarvatns til heimilisnota.
8. Lomé Agape í Togo fékk 4.000 evrur til að fræða börn undir 15 ára aldri um eyðni.
9. Fria Kimbo Espoir í Guinea fékk 4.000 evrur til endurmenntunar kvenna sem hafa starfað við umskurð stúlkna.
10. Ogré-Kegums í Lettlandi fékk 3.000 evrur til að gera leikvöll fyrir börn í Kegums.
11. Kigali í Rúanda fékk 5.000 evrur til að setja upp rafstöð til að vinna rafmagn úr sólarljósi.
12. Addis Ababa í Eþíópíu fékk 5.000 evrur til aðstoðar við menntun fatlaðra kvenna.
13. Port-au-Prince á Haiti fékk 3.500 evrur til að byggja skóla fyrir vanrækt börn.

Skólastyrkjanevnd

Að þessu sinni bárust 28 umsóknir. Alls voru veittir 16 styrkir að upphæð 71.288 evrur. Meðal þeirra sem fá styrk er Silja Aðalsteinsdóttir, en umsókn hennar var studd af Akranessklúbba.

Dr. Noél sjóðurinn

Að þessu sinni fékk belgískur lýtalæknir styrk að upphæð 8.000 evrur.

Friðarverkefni Monique Rivière, Evrópuforseta 2005 - 2007

„Byggjum vinnu að friðarverkefnum á menningararfleifð heimabyggðar“. Sérstök kynning á þessum friðarverkefnum verður á alheimspinginu í Glasgow í sumar.

Verkefnastjórar SI/E

Skýrslur allra verkefnastjóra voru samþykktar. Þær eru að finna á vef SI/E: www.soroptimisteurope.org

Tengiliður verkefnastjóra (Programme Liaison) lagði áherslu á að vanda þyrfti flokkun skýrslna eftir verkefnakjörunum. Nú er hægt að skila inn PFR-skýrslum jafnóðum og verkefnum lýkur en þær þurfa að berast fyrir 30. september til að komast með í næstu samantekt verkefnastjóra SI/E.

Útbreiðslunefnd

Formaður nefndarinnar, Rosa-Maria Walther, lýsti áhyggjum af fækkun félaga innan soroptimistasamtakanna. Á síðasta ári voru stofnaðir 22 nýir klúbbar en 14 í ár. Einnig hafa félagatölur einstakra klúbba lækkað. Nú eru 36 klúbbar með innan við 15 meðlimi. Ef ekki tekst að fjölga félögum gæti þurft að leysa klúbbana upp eða sameina öðrum. Hópar hafa verið stofnaðir í nokkrum löndum Evrópu þar sem ekki eru starfandi soroptimistaklúbbar, en árangur þess starfs er ekki kominn í ljós.

Afríka

Roswitha Ott hefur umsjón og eftirlit með þeim klúbbum í Afríku, sem tilheyra SI/E. Aðalstarf hennar er að hvetja og aðstoða klúbbana við að vinna að góðum verkefnum s.s. baráttu gegn umskurði kvenna og baráttu gegn eyðni. Hún hefur einnig unnið að undirbúningi stofnunar Afríkusambands soroptimista en afrísku klúbbarnir hafa enn ekki næga burði til að standa á eigin fótum. Enginn nýr klúbbur var stofnaður í Afríku á síðasta ári.

Laganefnd

Tvær minniháttar lagabreytingatillögur lágu fyrir og snérist báðar um starfsemi skrifstofu sambandsins í Genf. Voru þær samþykktar.

Heimasíða SI/E

Heimasíðan er uppfærð tvisvar í mánuði. Heimsóknnum á síðuna fjölgar ár frá ári og í apríl sl. voru um 500 heimsóknir á dag. Nú er unnið að því að færa síðuna í nútímalegra horf, með nýju útliti og einfaldari uppbyggingu.

Skýrslur landssambanda og stakra klúbba

Eliane Lagasse, 1. varaforseti, og Kirsten Sveder, 2. varaforseti, höfðu séð um að samræma skýrslur landssambandanna.

Af 26 landssamböndum skiluðu 24 skýrslum en aðeins rúmlega helmingur stakra klúbba.

The Link

Link er málagn SI/E og gefið út ársfjórðungslega. Hvert blað innihélt áður sömu greinar og upplýsingar bæði á ensku og frönsku. Það var því allþykkt og burðargjöld til áskrifenda nokkuð há. Á síðasta sendifulltrúafundi var samþykkt að gefa hvert eintak út á hvoru máli um sig. Þetta fyrirkomulag hefur haft mjög jákvæð áhrif á fjárhag blaðsins vegna stórlækkaðs póstkostnaðar.

Evrópuráðið og European Women's Lobby (EWL)

Tveir fulltrúar SI/E sitja í Evrópuráðinu. Þær hafa unnið sér þá stöðu með virkri þátttöku að mega taka þátt í milliríkjastarfermi og stefnumótunarvinnu ráðsins en það vinnur að fjölmörgum verkefnum og eru upplýsingar um þau að finna á vef ráðsins: www.coe.int. Okkar fulltrúar hafa sérstaklega beint kröftum sínum að verkefnum sem snúa að baráttu gegn mansali og ofbeldi gegn konum. SI/E á líka einn fulltrúa hjá EWL og starfar hún náið með fulltrúum Evrópuráðsins.

Framtíðarsýn soroptimistasamtakanna

Unnið hefur verið að undirbúningi að framtíðarstefnumótun fyrir soroptimistasamtökin. Í því skyni var stofnuð nefnd í fyrra með einni konu frá hverju heimshlutasambandi og fékkst sérstök fjárveiting frá alheimssamtökunum í þessa vinnu. Heidrun Konrad, fráfarandi Evrópusambandsforseti, er fulltrúi SI/E. Eftir alheimspingið verður hægt að kynna sér frekari framvindu verkefnisins á heimasíðu SI: www.soroptimistinternational.org

Næsti sendifulltrúafundur verður í Varsjá í Póllandi 5. – 6. júlí 2008.

Í ágúst 2007

Margrét E. Arnórsdóttir og Ingunn Ásdís Sigurðardóttir, sendifulltrúar



Hrafnhildur B. Sigurðardóttir

Frásögn og upplifun varasendifulltrúa

Um miðja nótt þann 10. maí lögðu 5 hressar soroptimistasystur af stað á sendifulltrúafund Evrópusambandsins (SI/E) sem fram fór dagana 11. – 13. maí 2007 í Toulouse í Suður-Frakklandi. Við vorum svo forsjálar að verða okkur úti um einkabílstjóra sem kom okkur í Leifsstöð og sótti okkur þegar komið var til baka. Fundinn sóttu að þessu sinni Ásgerður Kjartansdóttir, landssambandsforseti, Hafdís Karlsdóttir, frambjóðandi til embættis 1. varaforseta SI/E, Margrét Arnórsdóttir, sendifulltrúi, Ingunn Á. Sigurðardóttir, sendifulltrúi, og Hrafnhildur B. Sigurðardóttir, varasendifulltrúi. Flogið var um Frankfurt og komið seinni part dags til Toulouse. Veðurguðirnir tóku á móti okkur með sól og sumaryl, allt orðið grænt og gróðurinn farinn að springa út. Toulouse er fjórða stærsta borg Frakklands með eina milljón íbúa. Borgin er þekkt fyrir mikla menningu og fallegar byggingar. Haldið var beint á Hótel Albert, vel staðsett og notalegt hótel. Þegar systur höfðu komið sér fyrir var haldið í leit að veitingahúsi í nágrenninu. Eftir að hafa gengið á milli og kannað nokkur veitingahús varð eitt mjög snoturt og vel ilmandi með afar þjónustulunduðum þjónum fyrir valinu. Maturinn kitlaði bragðlaukana og fór þjónustan fram úr öllum væntingum þegar einn þjónninn vatt sér að einni okkar og mundaði munnþurrkuna á listilegan hátt þannig að matarleyfar í munnviki viðkomandi voru þurrkaðar.

Föstudaginn 11. maí var skrásetning á fundinn á Holiday Inn. Þar var mikið um fagnaðarfundi systra sem greinilega höfðu hist áður og höfðu um margt að ræða. Nýjar voru kynntar til leiks. Upp úr hádegi fór Ásgerður á formannafund en við hinar fengum tækifæri til að líta í verslanir. Um kvöldið var móttaka í ráðhúsinu, sem er mjög falleg bygging og þekkt fyrir sérstæða framhlið skreytt átta bleikum marmarasúlum. Móttökusalurinn var stór og fallegur en allur á lengdina. Þegar fjögurhundruð konur af ýmsum þjóðernum voru saman komnar varð hávaðinn vel yfir því sem heyrist í stóru fuglabjargi á varptímanum. Af þessum sökum skiluðu ræðuhöld sér bara til þeirra sem stóðu allra fremst. Hátíðarkvöldverður var á Holiday Inn. Á borði með okkur sátu systur frá m.a. Ísrael, Sviss, Þýskalandi og Hollandi. Þetta var sá tími sem nýttist hvað best til að ræða málin, fá hugmyndir og öðlast skilning á því hvað við erum oft að takast á við ólík málefni. Auk þess fengum við innsýn í gjörólíkan heim og aðstæður.

Laugardaginn 12. maí vorum við mættar kl. 8:15 í ráðstefnusal í Médiathèque-byggingunni sem var í göngufæri frá hótelinu. Monique Rivière, forseti SI/E, setti fundinn. Það sem kom mér hvað mest á óvart var hversu allt var óskipulagt, t.d. var enginn skipaður fundarstjóri sem mér finnst vera alger nauðsyn á svona stórum fundi. Monique Rivière var þrátt fyrir þetta mjög röggöm og reyndi hvað hún gat að hafa reglu á hlutunum.



Það má segja að hápunktur dagsins hafi verið kosningar í embætti 1. og 2. varaforseta stjórnar SI/E. Þrjár konur voru í framboði, Hafdís Karlsdóttir frá Íslandi, Nilgun Ozler frá Tyrklandi og Ceroline Junier frá Sviss. Tyrkneska sendinefndin kom vel undirbúin og færði öllum konum fallegagula öskju með unaðslegu „Turkish delight“. Þessir molar komu bragðlaukunum svo sannarlega af stað og létu vel í munni þrátt fyrir að vissst áróðursóbragð væri af þeim. Þegar búið var að telja atkvæðin kom í ljós að Ceroline Junier náði ekki kosningu og baráttan um fyrsta sæti stóð því á milli Hafdísar og Nilgun Ozler. Hafdís hafði fengið fleiri atkvæði en ekki nægilegan meirihluta þannig að fara þurfti fram kosning á milli þeirra tveggja. Loftið var mjög rafmagnað og myndaðist mikil spenna. Útkoman í seinni umferð varð sú að þær voru með jöfn atkvæði, þrjátíu atkvæði hvor. Vinkonur okkar úr sendinefnd Ísarels, sem skartaði lögfræðingi, kváðu upp þann dóm að Hafdís ætti að verða fyrsti varaforseti þar sem hún hafði fengið fleiri atkvæði í fyrri umferð. Það varð að vonum mikil ánægja meðal okkar þegar þessi niðurstaða var fengin. Fagnaðarlæti brutust út í salnum og var greinilegt að Hafdís átti þarna marga aðdáendur og rigndi yfir hana og okkur hamingjuóskum. Þetta var óneitanlega mjög skemmtileg upplifun. Við vorum að springa af stolti og þakklæti til Hafdísar fyrir að taka þetta mikilvæga starf að sér.

Um kvöldið var hátíðarkvöldverður á

La Feuilleraie sem er mjög fallegur veitingastaður fyrir utan Toulouse. Kvöldverðurinn var bæði á vegum SI/E og annars klúbbsins í Toulouse, sem fagnaði 70 ára afmæli sínu, og var mikið um dýrðir. Farið var í rútu og hófst mikið kapphlaup við tímann; koma sér af fundinum, hafa fataskipti og koma sér í rútna. Maturinn var afar góður, skemmtileg tónlist undir borðum og ræðuhöldum stillt í hof. Þarna náðu systur mjög vel saman, margt skrafað, mikill hlátur og gaman. Þegar halda átti heim eftir vel heppnað kvöld vorum við óneitanlega orðnar nokkuð þreyttar og sáum hótélrúmin okkar í hillungum. Þá kom í ljós að ökumaður okkar rútu var horfinn. Jacqueline Bourgeois, ein af skipuleggjendum, þaut þarna fram og aftur í síðu og efnismiklu siffonpilsu og var eins og fallhlíf í lendingu en hvergi fann hún manninn. Hófst nú miklar getgátur hvar ökumaðurinn væri, flestum datt nú í hug að hann hefði skroppið til einherrar vinkonu sinnar og gleymt stað og stund. Það var mikið myrkur og þéttur trjágróður þar sem við biðum eftir bílstjóranum. Aldrei kom hann og að lokum fengum við aðra rútu. Það voru ansi lúnar konur sem stauluðust svo loks heim um stræti Toulouse. Þótt liðið væri á nótt var enn allt iðandi af mannlífi sem við höfðum ekki þrek til að taka þátt í.

Það er engin spurning að næsta stjórn með Mariet Verhoef-Cohen frá Hollandi sem forseta og Hafdís og Nilgun sér við hlið verður mjög sterk stjórn. Ég er sannfærð um

að á næsta fundi verður betra skipulag þar sem farið verður betur eftir fundarsköpum.

Á sunnudeginum var haldið áfram þar sem frá var horfið á laugardeginum. Enn komu þær tyrknesku færandi hendi í tilefni mæðradags. Í þetta sinn voru þetta gul og blá gestahandklæði með merkinu okkar.

Systur frá Litháen sýndu mikinn áhuga fyrir norrænu vinadögum á næsta ári. Monique Riviere bað Roswithu Ott frá Sviss að segja frá starfi sínu í Afríku. Þessi frásögn hennar var óundirbúin, en engu að síður mjög áhugaverð og grípandi. Þá sagði forseti Kyrrahafssambandsins, sem var gestur fundarins, frá starfi þeirra þar. Systur, aðallega frá Afríku og Miðausturlöndum, voru með sölubása til styrktar hinum ýmsu málefnum. Það var heilmikið um að vera hjá þeim og seldu þær mikið. Í upphafi fundar hafði fundarkonum verið afhentir bómullarpokar undir fundargögn sem saumaðir voru í Rúanda fyrir SI/E og var það vel við hæfi. Ég hreifst mjög af þekkingu og vinnubrögðum Marie-Iréne Paléologue, framkvæmdastjóra SEP. Það hlýtur að vera ómetanlegt fyrir samtökin að hafa slíkan starfsmann.

Brottfarardagurinn rann upp með rigningu og hvassvirði, bæði í Toulouse og þó öllu meiri í Frankfurt, svo seinkun varð á flugi. Það var viðbúið að við næðum ekki tengiflugi heim. Þegar komið var til Frankfurt hófst mikið maraþon um sali og ganga flugstöðvarinnar til að koma sér í afgreiðslu íslensku vélarinnar. Hafdís náði

mestum hraða – með okkur hinar á hælunum. Þetta hafðist á síðustu mínútunum og það voru þreyttar en mjög ánægðar systur sem spenntu á sig beltin og tóku á loft eftir mjög góðan sendifulltrúafund og með íslenskan verðandi 1. varaforseta SI/E innanborðs.

Hrafnhildur B.
Sigurðardóttir



Kjöri Hafdísar fagnað. Hafdís, Hrafnhildur, Margrét, Ingunn og Ásgerður

Ökum varlega



Verkefnið „Ökum varlega“ fór af stað í kjölfar mikillar slyshrinu síðastliðið haust. Þá kom upp sú hugmynd að soroptimistasystur gætu barist fyrir betri umferðarmenningu meðal sinna nánustu, þ.e. barna, barnabarna, foreldra, félaga og kunningja. Það getur meðal annars falist í bættu ökulagi, árvekni, tillitsemi, að miða ökuhraða við aðstæður og yfirleitt að haga sér á ábyrgan hátt í umferðinni.

- Umferð er umhverfismál sem snertir alla þjóðfélagsþegna
- Soroptimistasystur eru reiðubúnar til hjálpar og þjónustu

Á haustfundi í Reykjaskóla sl. haust ræddi undirrituð hugmyndina að verkefninu við nokkrar systur og síðan þá hafa verið haldnir fundir í Hamraborginni og verkefnið þannig þróast áfram. Í undirbúningshópnum voru aðallega verkefnastjórar umhverfismála í nokkru klúbbum á höfuðborgarsvæðinu.

Verkefnastjórnarnir eru:

Elín Aðalsteinsdóttir, Árbæjarklúbbi,
Ellen Tyler, Kópavogsklúbbi,
Guðrún Helga Gylfadóttir, Reykjavíkurklúbbi,
Hiltrud Hildur Guðmundsdóttir, Akranessklúbbi,
Kristín Jónasdóttir, Bakka- og Seljaklúbbi,
Laufey B. Hannesdóttir, Fella- og Hólaklúbbi, og
Þórlaug Guðbjörnsdóttir, Setjarnarnessklúbbi.
Auk þess eru í undirbúningshópnum þær:
Sigríður Líba Ásgeirsdóttir, Reykjavíkurklúbbi, og
Sigrún Skaptadóttir, Fella- og Hólaklúbbi.

Kristín Einarsdóttir, upplýsingafulltrúi landssambandsins, er komin til liðs við hópinn nú þegar mest ríður á að kynna verkefnið sem víðast í fjölmiðlum.

Í upphafi vorum við með í huga að búa til miða með góðu slagorði til að hafa í afturglugga bíla. Mikil söfnun á góðum slagorðum hófst og mikið safnaðist. Hugmyndin að því að nota tákn í stað orða kom upp þegar Þórlaug kom með lista úr gamalli símaskrá yfir tákn eða skammstafanir sem notaðar eru í tölvu- og/eða SMS-samskiptum. Við vorum svo heppnar að fá Sigríði Líbu til liðs við okkur og hannaði hún merki á lyklakippu sem eru bæði falleg og eftirtektarverð. Sonur Guðrúnar Helgu kom einnig við sögu við túlkun tákanna. Lyklakippan er í lögun eins og bíll og úr málm. Prentað er á

báðar hliðar hennar, annars vegar textinn „ÖKUM EINS OG“ auk jákvæðra tákna og hins vegar textinn „ÖKUM EKKI EINS OG“ auk neikvæðra tákna.

Tryggingafélagið VÍS hefur boðist til að vera kynningar- og fjármögnunaraðili. Bæði VÍS og soroptimistar telja sig hagnast á þátttöku í verkefninu. VÍS með því að fá jákvæða athygli í fjölmiðlum og að fá soroptimistasystur til starfa við að reyna að bæta umferðarmenningu. Soroptimistar fá þannig líka kynningu í fjölmiðlum og tækifæri til að láta gott af sér leiða í þjóðfélaginu.

Lyklakippurnar eru framleiddar í Kína og eru væntanlegar til landsins 1. október. Við soroptimistasystur sjáum um að dreifa kippunum. Framleiddar eru 20.000 lyklakippur. Ef gert er ráð fyrir að 400 systur taki þátt í dreifingunni þarf hver systir að dreifa 50 kippum. Tala þarf persónulega við sérhvern sem fær kippuna. Flestar eiga stóran vinarhóp s.s. á vinnustað, í sauma- og spilaklúbbi, fyrir utan fjölskyldu og ættingja, þannig að þetta ætti ekki að vera erfitt. Sumar systur eiga auðveldara með dreifinguna en aðrar og verður að taka tillit til þess.

Nokkur góð orð við afhendingu:

Mig langar að gefa þér smá gjöf því að ég hugsa um velferð þína í umferðinni.

Þessi lyklakippa minnir þig á að:

- Aka varlega
- Að lífið er dýrmætt
- Að tillitsemi í umferð skilar sér
- Að sýna ábyrgð í umferðinni
- Að brosa í umferðinni
- Að vera þolinmóður

Framkvæmdaráætlun

1. Upphaf og kynning verkefnisins á haustfundi að Reykjum 6.-7. nóvember 2007.
2. Verkefnastjórar eru ábyrgir fyrir dreifingu kippunnar í sínum klúbbi.
3. Dreifing fer fram á ca. 2 vikum.
4. Um 50 stk. á hverja klúbbsystur.
5. Talað er persónulega við hvern og einn við afhendingu kippunnar.

Laufey B. Hannesdóttir



Íslensku soroptimistasysturnar á alþjóðáþingunni í Glasgow

Stjórnarfundur Alþjóðasambands soroptimista (SI) og alþjóðáþingið í Glasgow 25. júlí – 2. ágúst 2007

Stjórnarfundur fráfarandi stjórnar SI

Síðasti fundur stjórnar SI fyrir starfsárin 2005-2007 var haldinn dagana 25.-27. júlí 2007. Alls sátu 250 konur fundinn, bæði atkvæðabærir fulltrúar og áheyrnarfulltrúar. Var ég eini fulltrúi Íslands á fundinum en í góðum hópi með forsetum norrænu landssambandanna og gafst okkur þarna tækifæri til að endurnýja kynnin sem hófust á norrænu vinadögunum í Vaasa í Finnlandi í fyrra.

Þarna fluttu embættismenn SI skýrslur sínar, tilnefnt var í embætti og fjárhagsáætlun samþykkt. Var fundurinn mjög vel skipulagður en honum stjórnaði Lynn Dunning, forseti SI, af mikilli röggsemi. Verður hér gerð grein fyrir helstu atriðum fundarins.

Framtíðarsýn soroptimista (Strategic Plan)

Undanfarin misseri hefur verið unnið að mótun framtíðarsýnar fyrir soroptimista. Var hún vel kynnt enda er hér verið að færa samtökin inn í 21. öldina og móta stefnu um hvert 90.000 soroptimistar eiga að stefna og hvernig. Nefndin lagði fram plagg sem kallað er „Strategic Map“ þar sem fram kemur sýn samtakanna, meginhlutverk og helstu áhersluatriði. Var plaggið samþykkt og jafnframt að unnið yrði áfram að mótun þess næstu tvö árin.

Verkefnakjarni (Program Focus) 2007-2011

Nýr og gjörbreyttur verkefnakjarni fyrir starfsárin 2007-2011

var samþykktur. Honum er ekki lengur skipt upp í verkefnasviðin sex sem við þekkjum svo vel heldur í fjögur aðalmarkmið og 10 undirmarkmið. Samkvæmt verkefnakjarnanum skulu soroptimistar tryggja að konur og stúlkur njóti réttlætis og jafnréttis, búi í öruggu og heilbrigðu umhverfi, hafi aðgang að menntun og fái tækifæri til að byggja upp leiðtogaþæfni og starfstengda þekkingu.

10. desember verkefni forseta SI 2007

Verkefnið ber yfirskriftina „Restoring dignity – Hamlin Fistula Relief Aid Fund Addis Ababa Ethiopia“ og felst í að aðstoða konur sem þjást af því sem kallað er fistill á íslensku. Fistill er óeðlileg göng milli tveggja líffæra eða milli líffæris og ytra borðs líkamans. Konur sem fæða börn við aðstæður þar sem læknisfræðileg þekking er lítil eiga á hættu að fá fistil en við alvarleg tilfelli getur komið gat á þvagblöðru og þarma og konurnar geta því hvorki stjórnað þvagi né saur og eru útskúfaðar úr samfélaginu. Þær upplifa höfnun, skömm og einmanaleika. Fistil er hægt að laga með skurðaðgerð í flestum tilfellum og er Addis Ababa Fistula Hospital eina sjúkrahúsið í heiminum sem eingöngu sérhæfir sig í meðferð við fistli.

Fjögurra ára verkefni 2003-2007

Project Independence – Women Survivors of War

Kynnt var uppgjör á verkefninu sem unnið var í samvinnu við „Women for Women International“. Verkefnið þykir mjög vel heppnað og hefur haft víðtæk áhrif á konur í Afganistan,

Bosníu og Rúanda. Safnast höfðu \$1.357.000 en takmarkið var \$1.2 milljónir. Fjöldi kvenna hefur notið þjálfunar og fræðslu og fengið lán til að koma af stað atvinnustarfsemi. 47 bréfhópar voru stofnaðir til að skrifa á við konur í Afganistan, Bosníu og Rúanda. Nánari upplýsingar er að finna á www.womenforwomen.org/ProjectIndependence.

Fjögurra ára verkefni 2007-2011

Project Sierra – a family and a future

Þetta verkefni er unnið í Sierra Leone í Vestur-Afríku í samstarfi við samtökin „Hope and Homes for Children“ og heimafólk. Sierra Leone býar eru að byggja upp landið eftir margra ára stríðsátök og gengur verkefnið út á að styðja þá einstaklinga sem búa við hvað mesta örbirgð og veita þeim m.a. menntun og heilsugæsluþjónustu. Sjónum verður beint að ungum einstæðum mæðrum, sem urðu fórnarlömb kynlífsþrælkunar í stríðinu, götubörnum yngri er 12 ára og fjölskyldum þar sem hætta er á upplausn vegna fátæktar. Nánari upplýsingar er að finna á www.projectsierra.org.

Lasting Legacy-verkefnið

Í tilefni af ráðstefnunni í Glasgow var gefin út bók og geisladiskur sem seld voru til ágóða fyrir verkefni í tengslum við vatn og hreinlæti. Bókin „If I ruled the world“ hefur að geyma tilvitnanir og teikningar frá börnum og soroptimistum víða um heim sem lýsa því hvernig veröldin liti út ef þeir fengu að ráða. Er ánægjulegt að sjá að í bókinni er að finna fimm innslög frá Íslandi; fallega mynd eftir Þórdísi Þórarinsdóttur, 11 ára nemanda við Árskóla á Sauðárkróki, tilvitnun frá Hafþóri A. Tómassyni, 13 ára nemanda við sama skóla, og tilvitnanir frá þremur íslenskum soroptimistasystur, þeim Berglindi Ásgeirsdóttur, Salóme Þorkeldsdóttur og Sigrúnu Klöru Hannesdóttur.

Geisladiskurinn „One Soroptimist World“ sýnir myndir frá fjölbreyttu starfi klúbba víðs vegar um heiminn. Mynd frá Soroptimistaklúbbi Skagafjarðar var valin sem framlag Íslands en myndin sýnir fatlaða stúlku í sérstökum stól sem klúbburinn gaf sundlauginni í Varmahlíð. Íslenskir soroptimistar geta svo sannarlega verið stoltir yfir því hve vel starf okkar endurspeglar bæði í bókinni og á geisladisknum.

Alþjóðþingið 29. júlí-2. ágúst

Alls bættust 18 systur í hópinn þegar kom að alþjóðþinginu. Þetta voru þær Sigríður Baldursdóttir (Reykjavík), Kristín Sjöfn Helgadóttir (Árbæ), Guðrún Erla Björgvinsdóttir og Vidgís Pálsdóttir (Bakka og Selja), Jónína Guðnadóttir, Kristín Einarsdóttir, Margrét Helgadóttir og Mjöll Flosadóttir (Hafnarfirði og Garðabæ), Arna Björk Hjörleifsdóttir, Ingibjörg Kjartansdóttir og Sigríður Árnadóttir (Keflavík), Guðrún Pálsdóttir, Hafdís Karlsdóttir, Hildur Hálfánardóttir, Jóhanna Norðfjörð, Margrét Árnadóttir, Margrét Loftsdóttir og Þorbjörg Kristinsdóttir (Kópavogi). Með í för voru einnig eiginmenn Margrétar Helgadóttur og Jónínu Guðnadóttur.

Yfirskrift þingsins var „unity of purpose – diversity in action“ sem lýsir því vel að þó að við vinnum allar að sömu meginmarkmiðunum höfum við frelsi og tækifæri til að vinna að þeim á margvíslegan hátt.

Haldnir voru mjög áhugaverðir og fjölbreyttir fyrirlestrar. Við fræddumst um hlýnun jarðar hjá Peter Cox, um mikilvægi grundvallarheilbrigðisþjónustu fyrir mæður og börn hjá Mary Renfrew, fengum ráð hjá Rawwida Baksh um hvaða aðferðum soroptimistar þyrftu að beita til að konur gætu brotist út úr fátækt, fengum að heyra ógleymanlegar og hjartnæmar sögur frá Eve Richings, sjónvarpsfréttamanni hjá SKY sjónvarpsstöðinni, um bláfátæk götubörn og aðstæður barna á stríðshráðum svæðum víða um heim. Auk þess hlustuðum við á Ramu Damodaran tala um Sameinuðu þjóðirnar og hlutverk þeirra í friðarumleitunum, fræddumst um áhrif klasar-jarðsprengja hjá Simon Coway og hlustuðum agndofa á Satish Kumar segja frá 8.000 mílna friðargöngu sinni frá gróf Ghandis á Indlandi til grafar John F. Kennedy í Bandaríkjunum. Við fengum einnig að heyra frá fjölbreyttu starfi soroptimista víða um heim hjá forsetum heimshlutasambandanna og frá verkefnum eins og „Project Independence“ og „Project Five-O“ (www.project-five-o.org). Útdrætti úr erindum er að finna á vef ráðstefnunnar www.si-convention.org/presentations.

Auk fyrirlestra voru í boði málstofur um ofbeldi gegn konum, almannatengsl og öflun nýrra félaga, alnæmi og malaríu, umhverfismál og um aðgengi barna að menntun. Á málstofu um ofbeldi gegn konum var ég með erindi og sagði frá samvinnu Soroptimistasambands Íslands og fjölda frjálsra félagasamtaka í 16 daga átaki gegn kynbundnu ofbeldi undanfarin ár. Árangurinn af samvinnunni hefur leitt til þess að ríkisstjórnin hefur nú samþykkt aðgerðaráætlun gegn kynbundnu ofbeldi sem byggir á aðgerðaráætlun sem send var í kjölfar átaksins árið 2005. Vakti samvinnan og árangurinn athygli.

Að mínu mati voru tveir hápunktar á ráðstefnunni. Annar þeirra var heimsókn Önnu Bretaprinsessu og erindi hennar þann 30. júlí og hinn var friðarathöfn í lok ráðstefnunnar. Anna prinsessa hefur beitt sér mikið fyrir starfsemi Barnaheilla (Save the Children). Hún þekkir jafnframt vel til starfsemi soroptimista og hvatti okkur til að halda áfram að láta okkur þykja vænt um meðbræður okkar og systur og sýna áfram þá þolinmæði og skilning á aðstæðum sem mörg verkefni okkar krefjast. Við Kristín Einarsdóttir vorum svo heppnar að vera boðnar í sérstakan hádegisverð ásamt um 100 öðrum systur þar sem við vorum kynntar sérstaklega fyrir prinsessunni.

Annar hápunktur var friðarathöfn í lok ráðstefnunnar þegar þjóðfánar aðildarlandanna voru látnir mynda hring fyrir utan ráðstefnumiðstöðina og allar 1500 systurnar stóðu hvítklæddar inn í hringnum. Lynn Dunning, forseti SI, og forsetar heimshlutasambandanna slepptu 5 hvítum friðardúfum sem tákn um friðarboðskap okkar soroptimista.

Þingið var afskaplega vel heppnað í alla staði og sérlega vel skipulagt. Dagarnir tíu í Glasgow voru langir og annasamir en fljótir að líða því margt var til umræðu og samverustundir skemmtilegar með systur alls staðar að úr heiminum. Ég hlakka til næsta alþjóðþings sem haldið verður í Montreal í Kanada árið 2011 og vona að íslenskar systur fjölmenni vestur um haf. Þátttaka í alþjóðlegu soroptimistaþingi er ógleymanleg lífsreynsla.

Ásgerður Kjartansdóttir



Soroptimistaklúbbur Hafnarfjarðar og Garðabæjar

Klúbburinn var stofnaður 26. maí 1973 og var annar klúbburinn sem var stofnaður hér á landi en 14 árum áður, eða árið 1959, hafði Reykjavíkurklúbburinn verið stofnaður.

Félagarnir í klúbbnum eru nú samtals 37 en einn af okkar eldri og frábæru félögum, Luisa Bjarnadóttir, lést á haustdögum á síðasta ári.

Við höldum fundina okkar fyrsta mánudag hvers mánaðar yfir vetrartímann og reynum eftir megni að hafa þá bæði fróðlega og skemmtilega. Við brydduðum til dæmis upp á þeirri nýbreytni á síðastliðnu starfsári að láta fundina enda á dagskrárliðnum Orð kvóldsins. Þá les ein systir ljóð, litla sögu eða segir frá einhverju. Þessum dagskrárlið fylgja þau skilyrði að hann verður að vera örstuttur og bráðskemmtilegur því tilgangurinn með honum er sá að systurnar gangi brosandir af fundinum. Það finnst okkur mikilvægt á tímum þar sem streita, þreyta og harka ráða ríkjum.

Klúbburinn okkar hefur verið virkur þátttakandi í bæði landsverkefnum svo og þeim alþjóðlegu en aðalverkefni okkar frá árinu 1992 og allt fram á daginn í dag, eða í samtals 15 ár, hefur verið að styðja og styrkja meðferðarheimilið í Krýsuvík. Upphafið að þeim stuðningi okkar var með

þeim hætti að þáverandi forsvarsmenn höfðu samband við klúbbinn og báðu um aðstoð. Það var síðan samþykkt og nefnd sett á laggirnar til að hafa yfirumsjón með framkvæmd þessa verkefnis. Strax í upphafi var ákveðið að afhenda enga peninga heldur greiða fyrir ákveðnar umbætur sem bráðnauðsynlegt var að gera á staðnum til að hann mætti sem best þjóna starfsemi sem þar fór fram.

Á þessum tíma hafði hin vinsæla ferðavika klúbbsins verið haldin þrisvar sinnum þannig að þó nokkrir peningar voru til í sjóði. Það fyrsta sem við keyptum fyrir heimilið var sérsníðaður lyfjaskápur og því næst 25 hurðir með körmum því ekki voru nema 4 hurðir þar fyrir og ástandið því langt frá því að vera viðunandi.

Næstu árin var svo haldið áfram, 2 baðherbergi voru innréttuð auk þess sem nýtt og stærra eldhús var innréttuð ásamthlýlegum matsal. Með þessari aðstoð breyttist öll starfsemi meðferðarheimilisins til hins betra. Of langt mál yrði að rekja allar framkvæmdirnar hér á þessum síðum en þó verður ekki hjá því komist að geta þess hve gífurlega stór áfangi náðist þegar innréttuð var sérstök kvennaálma með 4 herbergjum, lítilli stofu og baðherbergi. Allan þennan tíma tóku klúbbsystur

virkan þátt í aðgerðum á staðnum. Farið var í sérstakar vinnuferðir, allt þrifið hátt og lágt og saumaðar gardínur eða þær þvegnar sem fyrir voru. Langoftast voru þessar ferðir farnar þegar adventan var að hefjast og því þótti tilvalið að enda hreingerningardaginn með því halda eins konar litlu jólfyrir vistmennina og starfsfólkið; elda góðan mat sem var borðaður við kertaljós og síðan var spilað á gítar og sungið. Alveg frá upphafi höfum við gefið vistmönnum jólagjafir og hafa það oftast verið hlýjar og notalegar flíspeysur. Árið 2006 gaf svo klúbburinn myndvarpa og fartölvu til notkunar í fyrirlestrasal heimilisins.

En eitt það allra stórkostlegasta sem klúbburinn hefur gert til að styðja við starfsemi þessa markverða meðferðarheimilis var að standa straum af kostnaði við svonefnt árangursmat sem framkvæmt var af 2 ungum konum í Háskóla Íslands, þeim Björgu Ólafsdóttur og Sigríði Sigurðardóttur, undir stjórn Sigurlínu Davíðsdóttur, lektors. Matið fór fram árið 2004 og niðurstöður þess sýndu svo ekki verður um villst að meðferðin í Krýsuvík er að skila mjög góðum árangri. Voru þessar niðurstöður sannarlega mikil lyftistöng fyrir áframhaldandi störf þeirra sem vinna

Systur með
ferðafélögum
á góðri stundu



við að hjálpa þeim sem glíma við það skelfilega ból sem áfengis- og fíkniefnavandinn er.

Eins og áður hefur komið fram þá hefur Soroptimistaklúbbur Hafnarfjarðar og Garðabæjar haldið svonefnda ferðaviku fyrir erlenda soroptimista og fjölskyldur þeirra um árabíl og eru þær nú orðnar 10 talsins. Ferðavikan verður sífellt vinsælli og nú síðast (árið 2006) voru erlendir

þátttakendur samtals 46 frá 11 löndum. Undirbúningurinn krefst gífurlega góðs skipulags og óeigingjarnrar vinnu en er bæði hvernig mínútu og hvernig krónu virði, á því er enginn vafi í okkar huga.

Loks langar okkur að geta eins sem við erum ákaflega stoltar af og það er vefsíðan okkar en uppsetning hennar hefur alfarið verið í höndum okkar ágæta félaga, Höllu Bjargar Baldursdóttur.

Hér ætlum við að láta staðar numið og vonum að þeir sem lesa þessa kynningu sjái hve stóran sess markmið og hvatning soroptimista skipa í starfi okkar systranna í Hafnarfirði og Garðabæ.

Með bestu kveðjum frá okkur öllum í klúbbnum, Guðlaug Konráðsdóttir og Kristín Einarsdóttir



Starfið mitt

Sigríður Inga Sigurðardóttir, Hafnarfjarðar- og Garðabæjarklúbbi



Ég er fædd í Reykjavík þann 17. júlí 1971. Foreldrar mínir eru Sigurður Björgvinsson, skólastjóri, og Ingibjörg Þorleifsdóttir, kennari. Ég er gift Jóni Áka Leifssyni, efnaverkfræðingi, og eigum við þrjú börn. Þau heita Hildur Björg, 6 ára, Leifur Már, 3 ára, og Haukur Freyr, 6 mánaða. Ég sleit barnsskónum á Ísafirði en hef búið á höfuðborgarsvæðinu síðustu fimmtán árin, þar af síðustu fimm í Garðabænum.

Ég hef starfað við blaðamennsku frá árinu 1999, fyrst sem blaðamaður en síðustu tvö árin sem ritstjóri. Ég var langt komin með nám í þjóðfræði og þýsku við Háskóla Íslands þegar ég rakst á atvinnuauklýsingu sem vakti strax áhuga minn. Þar var óskað eftir blaðamanni á tímaritið Nýtt Líf. Ég ákvað að sækja um og fékk starfið. Áður hafði ég m.a. unnið sem flugfreyja hjá Atlanta, starfað sem leiðsögumaður hjá Árbæjarsafni, sinnt verslunarstörfum og unnið í fiskvinnslu. Blaðamennskan hafði hins vegar lengi heillað mig og þarna sá ég kærkomið tækifæri til að spreyta mig á þeim vettvangi. Reyndar hafði ég tekið fyrstu skrefin í þessa átt þegar ég var tólf ára og sá um barnasíðu í mánaðarblaði sem gefið var út á Ísafirði. Þá hafði ég unnið við blaðamennsku á Tímanum skömmu eftir stúdentspróf frá Menntaskólanum við Sund, en aðeins um stutt skeið.

Starfið hjá Nýju Lífi fólst í að taka viðtöl við fólk, skrifa greinar um allt milli himins og jarðar og búa til auglýsingaefni af ýmsu tagi. Mikilvægt var að vera vakandi fyrir fólki sem hafði frá einhverju áhugaverðu að segja og fylgjast með fréttum, mönnum

og málefnum. Vinnan fór svo sannarlega ekki aðeins fram við skrifborðið því oft kviknuðu bestu hugmyndirnar yfir kaffibolla með vinnufélögunum. Vinir og vandamenn voru líka duglegir við að benda mér á skemmtilegt fólk eða efni í greinar.

Á meðan ég vann hjá Nýju Lífi voru haldnir vikulegir ritstjórnarfundir þar sem hugmyndum var varpað fram og ákveðið hvaða efni ætti erindi í blaðið. Eftir fundina var sest við símann og hringt í fólk, ýmist til að óska eftir viðtali eða fá upplýsingar vegna greinaskrifa. Yfirleitt tók fólk því ljúflega að koma í viðtöl þótt sumir segðust ekki hafa frá neinu sérstöku að segja. Þeir létu samt oftast til leiðast, enda kom yfirleitt á daginn að þeir höfðu upplifað margt áhugavert.

Í blaðamennsku þarf að virða ákveðin tímamörk, sem getur verið afar erfitt, en þegar þau nálgast getur oft verið handgangur í öskjunni.

Margir koma að vinnslu efnis í tímarit. Þegar ég hef tekið viðtöl tekur ljósmyndari myndir af viðmælandanum. Myndvinnslufólk vinnur síðan myndirnar fyrir prentun. Prófaralesari les viðtalið gaumgæfilega yfir og gætir þess að hvergi slæðist inn villur. Loks tekur grafískur hönnuður við og brýtur um blaðið áður en það fer í prentun. Mér finnst lokavinnslan sérlega skemmtileg því þá sér maður hvernig blaðið kemur til með að líta út áður en það birtist lesendum.

Samhliða starfi mínu á Nýju Lífi skrifaði ég fjölda greina og viðtala fyrir Gestgjafann og hafði auk þess umsjón með mörgum

myndatökum. Mér fannst það skemmtileg tilbreyting, auk þess sem áhugi minn á matargerð hefur aukist mjög með árunum.

Fyrir tveimur árum bauðst mér að taka við nýju starfi innan fyrirtækisins sem ritstjóri sérrita. Í því fólst að hafa umsjón með ýmsum aukablöðum sem fylgdu tímaritum Fróða, sem í dag heitir Birtingur, og ritstýra sérstöku tímaritum fyrir fyrirtæki. Ég ákvað að slá til og óhætt er að segja að starfið hafi verið fjölbreytt. Ég hef m.a. ritstýrt blöðum um börn, bíla, brúðkaup og fleira. Á meðal fyrirtækjatímarita sem hafa verið í mínum höndum eru Lífið heil fyrir Lyfju og Leifur Eiríksson, Air Terminal and Travel Magazine sem er sérstaklega gert fyrir Flugstöð Leifs Eiríkssonar.

Helsti munurinn á því að vera ritstjóri og blaðamaður er að sem ritstjóri þarf ég að halda utan um heilt blað og fylgja því alla leið í prentsmiðju. Það er í mínum verkahring að sjá um að allir blaðamenn og ljósmyndarar skili sínu efni á réttum tíma og koma því áfram í umbrot. Ég hitti tengiliði mína hjá Lyfju og Flugstöðinni reglulega og við leggjum línurnar fyrir næstu blöð. Ég kom að því að móta Lífið heil og Leif Eiríksson frá grunni og ákveða hvernig efni skyldi vera í þeim blöðum. Jafnframt hef ég skrifað greinar og viðtöl í þessi blöð.

Þessi ár hafa verið skemmtileg, lærdómsrík og fljót að líða. Það sem stendur upp úr, þegar ég lít til baka, er allt það góða fólk sem ég hef unnið með í gegnum tíðina og ég gæti vart hugsað mér að vinna við eitthvað annað.



Syngjandi systur í Skagafjarðarklúbbi

Soroptimistaklúbbur Skagafjarðar

Það var á vordögum, nánar tiltekið 27. maí 1989, að 23 vaskar konur úr Skagafirði komu saman og stofnuðu Soroptimistaklúbb Skagafjarðar. Núna erum við jafnmargar og þá, en að sjálfsgöðu hafa orðið talsverðar mannaþreyingar.

Eins og aðrir soroptimistaklúbbar vinnum við systurnar að þeim manngildismarkmiðum sem hreyfingin gefur sig út fyrir. Við komum saman einu sinni í mánuði yfir vetrartímann og nú síðustu árin hittumst við markvisst nokkrum sinnum yfir sumarið vegna umhverfisverkefnis sem við vinnum fyrir sveitarfélagið okkar, en það er jafnframt okkar aðalfjáröflun.

Við erum ekki með fastan fundarstað, en hittumst oft á heimilum og vinnustöðum systra sem og á fleiri stöðum. Þegar við ætlum virkilega að gera okkur glaðan dag og hafa það huggulegt þá verður Langamýri oftast fyrir valinu og er það sérstakur upphaldsstaður í hugum okkar allra. Þar lifði og starfaði Margrét Jónsdóttir, klúbbsystir okkar, sem lést fyrir nokkrum árum.

Til margra ára var rekin sjoppa á Sjúkrahúsinu á Sauðárkróki þar sem systur seldu eitt og annað sem bæði sjúklingar og gestir þeirra gátu notfært sér. Matreiðslubók settum við saman og seldum. Áður en Margrét á Löngumýri féll frá hafði hún forgöngu um að safna mataruppskriftum sem hún vildi að við klúbbsystur gæfum út á bók og seldum til ágóða fyrir klúbbinn. Eftir lát hennar ákváðum við að gera alvöru úr þessu og ágóðanum af bókinni var varið til að láta mála mynd af Margréti sem soroptimistasystur gáfu Löngumýrarstað til minningar um hana.

Eins og áður hefur komið fram er helsta tekjulind okkar nú umhverfisverkefni sem við vinnum fyrir sveitarfélagið. Umhverfisnefnd Sveitarfélags Skagafjarðar ákvað að veita verðlaun fyrir góða umgengni í sveitarfélaginu, bæði einstaklingum, bændabýlum og fyrirtækjum og fékk soroptimistaklúbbinn til að sjá um að skipuleggja og vinna verkið. Þetta varð

svo til þess að við systurnar þeysum um fjórðinn þveran og endilangan svona 3-4 saman og skoðum sveitabýli, fyrirtæki og garða. Sannarlega hefur þetta opnað augu okkar enn frekar fyrir umhverfi okkar og einnig styrkt tengslin okkar í milli.

Eitt af okkar verkefnum er að kynna konum af erlendum uppruna sem búsettar eru í Skagafirði. Tvívegis höfum við boðið þeim í mat og átt með þeim mjög skemmtileg kvöld. Mikill áhugi er fyrir því að þróa þetta verkefni áfram.

Fyrir utan verkefni sem við styrkjum á alþjóðavettvangi og á landsvísu hafa margar sumargjafir verið gefnar til Sjúkrahússins á Sauðárkróki. Á síðastliðnu ári var sumargjöfin baðstóll fyrir fötluð börn sem gefin var til sundlaugarinnar í Varmahlíð. Árlega veitum við stúlkum í 10. bekk grunnskólanna í Skagafirði verðlaun í lífsleikni.

Við eigum 2 vinaklúbba, annan í Hollandi en hinn í Köge í Danmörku. Mjög gott samband er við klúbbinn í Hollandi, þangað höfum við farið tvisvar og hafa ferðirnar verið sérstaklega skemmtilegar þar sem við höfum dvalið á heimilum systra og notið einstakrar gestrisni og vináttu. Einmitt núna erum við að undirbúa komu þeirra sem verður á næstu dögum. Vinaklúbburinn okkar í Danmörku er nýrri af nálinni og höfum við ekki hist enn.

Það er orðinn fastur liður að Norðanklúbbarnir og Austfjarðaklúbburinn hittast fyrstu helgina í september og blanda geði. Þetta haustið á að hittast á Austurlandi og hugsam við okkur gott til glóðarinnar. Óneitanlega er það þægilegra fyrir okkur norðan- og austankonur að farið er að halda haustfundinn að Reykjum í Hrótafirði.

Það sem mér finnst einkennandi fyrir klúbbinn okkar er góður andi og vinátta systra, alltaf skemmtilegt að hittast, vera saman og vinna að góðum málefnum.

Helga Friðbjörnsdóttir, formaður Skagafjarðarklúbbs

Starfið mitt

Ásdís S. Sigurjónsdóttir, fyrrverandi loðdýrabóndi, Skagafjarðarklúbbi



Ég er fædd á Syðra-Skörðugili í Skagafirði 27. desember 1949. Foreldrar mínir voru Sigrún Júlíusdóttir, húsfreyja, og Sigurjón M. Jónasson, bóndi, en þau bjuggu á Skörðugili alla sína búskapartíð. Eftir barnaskólanám á heimaslóðum fór ég til Reykjavíkur í gagnfræðanáám, en í Skagafirði var enginn héraðsskóli eins og í flestum öðrum landshlutum. Skagfirðingar komu sér aldrei saman um hvar héraðsskóli ætti að rísa, en héraðsskólaleysið í Skagafirði hefur örugglega dregið mikið úr framhaldsmenntun unglunga í héraðinu. Eftir gagnfræðaskólanámið lá leiðin í Kennarskólann (KÍ) og lauk ég kennaranámi 1970. Meðan ég var KÍ kynntist ég manningum mínum en hann heitir Einar E. Gíslason og er landbúnaðarkandídat að mennt, en hann var þá tilraunastjóri á tilraunabúi ríkisins á Hesti í Borgarfirði, svo þangað lá leiðin að kennaranámi loknu. Það var býsna mikil upplifun fyrir unga húsmóður að byrja að búa á ríkisbúinu Hesti, þar var alltaf margt um manninn og mikill gestagangur bæði innlendra og erlendra manna. Það voru lærdómsrík en skemmtileg ár sem við bjuggum þar.

En svo kom að því að foreldrar mínir treystu sér ekki til að búa lengur ein og buðu okkur að taka við Skörðugili, svo árið 1974 flytjum við á mínar heimaslóðir.

Einar gerðist þá ráðunautur í sauðfjár- og hrossarækt í Skagafirði svo uppeldi sonanna og bústörfin komu að miklu leyti í minn hlut, í góðri samvinnu við foreldra mína.

Við bjuggum með sauðfé og hross, en 1981 bættum við refarækt við bústofninn og keyptum þá 40 læður sem urðu þegar flest varð 120, en árið 2000 hættum við með refi. Árið 1983 fórum við svo einnig í minkarækt og byrjuðum þá með 60 læður, en nú haustið 2007 verða settar á 2.500 minkalæður.

Þegar ég byrjaði að fódra fyrstu refina okkar bjuggum við til fódrið heima og hræðum það í lítilli steypuhræivél og svo setti ég það í 20 kílóa fötu og keyrði fötuna í barnakerru á milli búrana þegar ég var að fódra dýrin, núna er fódrað með tölvustýrðri fóðurvél sem tekur 500 kg í einu.

Loðdýraræktin í landinu er ung búgrein og hefur þurft að ganga í gegnum ýmsa byrjunarörðugleika. Skinnin eru verkuð og þurrkuð hér heima og síðan send erlendis á markað og fer sala á þeim fram við hamarshögg á sérstökum skinnauppboðum.

Margir þættir eins og veðurfar, tiskusveiflur, framboð og efnahagsástand í heiminum hafa því áhrif á verðin og þar með afkomu okkar.

Að rækta minka er spennandi atvinnugrein, sem byggir á nákvæmni í hirðingu. Þar gildir eins og í öðru uppeldi að annast dýrin af alúð og umhyggju ef árangurinn á að verða góður.

Við Einar eigum fjóra syni Einar Eðvald f. '71, Elvar Eylert f. '72, Eyþór f. '76 og Sigurjón Pálma f. '80. Þeir hafa allir verið áhugasamir og duglegir að hjálpa til við búskapinn frá því þeir fóru að geta tekið til hendinni og allir hafa þeir valið sér menntun og störf tengd landbúnaði. Ég hef einnig eignast fjórar indælar tengdætur og tvö barnabörn.

Nú hafa aftur orðið kynslóðaskipti á jörðinni og tveir elstu synirnir og þeirra konur hafa tekið við búskapnum en ég er farin að vinna utan heimilis og starfa sem kennari í Varmahlíðarskóla, en ég aðstoða við búskapinn á álagstímum. Það felst reyndar meira orðið í að elda ofan í mannskapinn en matargerð og bakstur er eitt af því sem mér hefur alltaf þótt mjög skemmtilegt og það að setja mikið í pottana og hafa margt fólk í kringum mig á mjög vel við mig.

Fyrir utan að vera soroptimisti hef ég tekið talsverðan þátt í félagsmálum, verið í Kvenfélagi Seyluhrepps, frá því ég flutti heim aftur, og formaður þess í nokkur ár, var einn af stofnendum Garðyrkjufélags Skagafjarðar og hef einnig setið í nokkrum nefndum fyrir sveitarfélagið.

Ég fór í ferðalag til Skotlands fyrir nokkru og kom þaðan alveg miður mín yfir því að við Íslendingar ættum ekkert þjóðarblóm og skrifaði þáverandi landbúnaðar ráðherra Guðna Ágústssyni og bað hann að sjá um að valið yrði þjóðarblóm fyrir Íslendinga. Hann brá skjótt við og sá um að setja í gang ráð og nefndir til að velja blómið. Ég varð afar hamingjusöm þegar valið varð holtasóley, það var blómið sem ég óskaði mér helst.

Í fimm sumur sá ég um rekstur kaffistofu við byggðasafnið í Glaumbæ, fyrstu tvö árin í samvinnu við aðra ágæta konu og svo í þrjú ár ein. Í gegnum búskaparárin höfum við hjónin verið svo heppin að hafa verið beðin um að taka á móti alls konar hópum fólks, reyndar oftast áhugafólki um hesta, sauðfé eða loðdýr, en slíkar heimsóknir eru bæði gefandi og skemmtilegar.

Ég er að nálgast sextugsaldurinn en ég er ekki enn farin að finna þessa fullorðins-tilfinningu sem ég hélt að maður ætti að fyllast af þegar maður yrði „fullorðinn“, en hlakka bara til þess sem framtíðin ber í skauti sér og að fylgjast með börnum, barnabörnum og þróun minkarættarinnar.

GÓÐIR
GLITNIS
PUNKTAR

SKRÁÐU
ÞIG
NÚNA!

ÞÖKKUM FRÁBÆRAR MÓTTÖKUR!

Þúsundir viðskiptavina hafa nú þegar skráð sig í Vildarklúbb Glitnis. Ert þú ekki örugglega einn af þeim? Meðlimir safna verðmætum Glitnispunktum fyrir það eitt að vera í viðskiptum við Glitni og samstarfsaðila.

Vildarklúbbur Glitnis margborgar sig ... punktur!

GLITNIR

Kynntu þér málið á www.glitnir.is,
í næsta útibúi eða hjá Þjónustuveri í síma 440 4000.